

UNIVERSAL  
LIBRARY

**OU\_228554**

UNIVERSAL  
LIBRARY



OSMANIA UNIVERSITY LIBRARY

Call No.

۴۹۴۳

Accession No.

۲۴۵۸

Author

امیر اسماعیل  
۱-ق

Title

قرائت کتابی

This book should be returned on or before the date  
last marked below.

---



# قُرَآنِ کَرِیْمِ

بِسْمِ اللَّهِ الرَّحْمَنِ الرَّحِيمِ

مکاتب ابتدائیه شاگردانہ مخصوص اولق اوزره  
نقل و تحریر ایدلمشدر .

محرری

احمد راسم

بِسْمِ اللَّهِ الرَّحْمَنِ الرَّحِيمِ

صاحب : کتابچی قره بت

معارف نظارت جلیله سنک رخصتیه طبع اولمشدر

استانبول

(قره بت) مطبعه سی — باب عالی جاده سنده

۱۳۱۳



صيفه	صيفه	
۳۶	۱ آری	افاده
۳۷	۴ اوکوز	الله
۳۹	۶ چایر ، قوری اوت	ارض ، مسکنمز ، جغرافیا
۴۱	۸ نزاکت ، کرم ، مرحمت	دعا
۴۴	۹ اون ، اتمک	دکز
۴۶	۱۱ بوز - قطبلر ، نقاط اصلیه	بابا
	۱۲ قیزاقلر ، رنلر ، لاپونلر	زراعت ، صنعت
۴۹	۱۴ بیوک قرداشک درسلی	او
۵۲	۱۶ کوندوز - کیجه	قرداش ، همشیره
۵۵	۱۸ مسرور اولمهک چارهسی	یمشالر
۵۶	۱۹ کلیمک - ایپک بوجکی	اوقیوب یازمه
۵۹	۲۱ مکتب	طاووق ، یورطه ، جیوجیو
۶۰	۲۳ وطن عثمانلی دواتی	جسارت
۶۱	۲۵ کاغد	آت
۶۲	۲۶ اورمان جناب حقک اییلکی	ناموس ، قناعت
۶۵	۳۰ اورمانده بولنان نبات	قوشلرک فائدهسی
	۳۲ و حیوانات	تمیزلک
۶۶	۳۳ اورمانده بولنان حیوانلر	اختیارلره رعایت
۶۷	۳۵ انی خویلی اولهلم	صبح ایشی

صحیفہ	صحیفہ	
۸۱	۶۸	کرنی دکر — فورطنہ
۸۳	۶۹	اورمانده بولنان حیوانلر بورا — واپور
۸۵		( مابعد ) برکوملکک تاریخی
۸۸	۷۱	نجیب ایله خسته والده سی پاموق آغاجی
۸۹	۷۳	چارشبلر — کتن — بز طاغ — ییغنی
۹۳	۷۴	حیوانلره فنا معامله ایتیمک طاغ — بوزلقلر
۹۵	۷۶	کومس حیوانلری طوغریلق
۹۷	۷۷	کوپک عادی ساعت چالار ساعت
۹۹	۷۸	بر چوجغک دعاسی قویون — یوئ
	۸۰	مسجد — جامع آی — سیاره لر — ثوابت



# قرائتِ کتابی

برنجی سینہ

مکاتب ابتدائیه شاگردانہ مخصوص اولمق اوزره  
نقل و تحریر ایدلمشدر .

محرری  
احمد راسم

بشربی طبع

صاحبی : کتابچی قره بت

معارف نظارت جلیله سنک رخصتیه طبع اولنمشدر

استانبول

( قره بت ) مطبعه سی — باب عالی جاده سنده

۱۳۱۳

## ❖ افاده ❖



مکاتب ابتدائیه نك اهمیتى جمله نك معلومیدر . دولت و ملت ،  
 او مکتبلرده آجیلان ازهار افکاردن استفاده ایده جکدر .  
 مکاتب ابتدائیه ده کوریه جک انتظام ، مکاتب عالییه نك انتظامنه  
 دلیل اولور .

مکاتب ابتدائیه ده اهمیت ویریه جک ماده اوراده تدریس  
 ایدیلن کتابلرک انتظامیدر . اطفاله مخصوص اوله رق قلمه  
 آله جق هر درلو درس کتبی بر اهمیت مخصوصه یی حائزدر .  
 زیرا ، چوجق بللدیکیلر قالیر « ضرب مثلی هر زمان کورلمش  
 و کورلمکده بولنشددر . اوان صباوت معلومات وسیعیه یی دکل  
 بلکه معلومات مفیده و مختصره یی اخذ و بلعه زیاده استعدادنما  
 اولدیغندن اوتازه فکرلری ، بهوده فکرلرله یورمق امثال و حکایات  
 ایله طولدرمق ، تاریخه نیم مناسبتی اولان وقایع ایله آلوده ایتک  
 یازقدر . برچوجق هر شیئی تعقله ، تیقنه علوم و فنوندن بر  
 نبذه معلومات آلدقن صکره باشلار . جغرافیادن بی خبر اولان  
 چوجغه اسکندیر کیرک اسفاردن ، حکمتدن بی خبر اولان  
 چوجغه آریستونک فلسفیاتندن ، اخلاقک معنای عمومیسنه  
 عقل ایردیرمامش بر چوجغه اخلاقیونک متلرندن نه فائده  
 اولور ؟

( تعليم اطفال ) مسئلہ سی دنیائک ہر طرفندہ اہمیت کاملہ  
ایلہ تلقی ایدلایکندن انلرہ دائر یازیلان کیتابلردہ اہمیتلہ تلقی  
اولمشدر .

شوراسی جای نظردرکہ یکی اوقومغہ اقتدار کسب ایدن  
بر چوجنگ ایلک اوقویہجفی کتساب قرائت کیتابلریدر . بر  
چوجق اوقودیغندن برشی آکلاماز ایسہ عجیبا ذہننہ ویرہجکی  
تعبدن بشقہ اوزرندہ حاصل ایدہجکی تأثیر نہدر ؟ شہہسزدرکہ  
بییقنلق .

بز ایسہ اولادمزی اوقومتق فکرندہیز . بوندندہ واز کچہلم .  
کندیسنجہ معماشکلنی باغلامش اولان سطرلر قارشیسندہ برتازہ  
فکر نہ حال کسب ایدر ؟ باخصوص برطرفدن ابوین برطرفدن  
خواجہنک زوری ، ابرامی آنی دائما اوقومغہ سوق ایدیور .  
ایشته بومسائلک جملہسی حل ایدلمش . مسئلہی حل ایدن  
( سادہ یازمق ) ( چوجقلرک آکلابہیلہجکی شیلری یازمق )  
فکرلریدر .

احمد راسم



﴿مکاتب ابتدائیه شاگردانه مخصوص﴾

﴿قرائت کتبی﴾

{ اخلاق }

۱ — الله

چو جو قلر !

آقشام اوستی مکتبدن اوگزده گلدیگنر وقت ،  
آناگزده قارنم آج ! اوشیورم ! یورغو نم دیه سویلنیرسگنر .  
اوده قارنگزی طویورر . سزی یاقدیغی آتشیك کنارینه  
اوطور تور . یورغو نلغنگزی کیدر ته جك شیلری یاپار .  
آناگزك سزه ایتدیگی بوایلکه قارشو یورگنزدن  
انسانك برآناسی اولمق نه قدرایی دیرسگنر دگلمی ؟

چو جو قلر !

سزك آناگزدن دها مرحمتی ، دها ای برذات

واردرد. او، سزه بوایی آنایی ویرمش، دنیایی یاراتمش  
 گوردیگمز گونشی، آیی یوقدن وارا یتمش اولان الله در.  
 الله بردر. هر شیئی گوردور. ایشیدر، طویار. اییلکلر.  
 مزى. فناقلر مزى بیلیر. اییلک ایدنلری سور،  
 فناقل ایدنلری سومز. چالیشهلم. اییلک ایدوب اللهک  
 سوگیلی قولى اولهلم.

### وظیفه — ۱

بزه وظیفه لر مزى اوگره تن علمک آدی ندر؟ بزه ایی  
 اولق ایچون لازم اولان شیلری اوگره تن هانگی علمدر؟  
 علم اخلاق. بزم کیمه قارشى وظیفه لر مزى واردرد! اولا اللهه  
 قارشى. گوردیگمز شیلری کیم یاراتمشدر؟ کوکده کی ییلدیزلری،  
 آیی، گونشی. بولوطلری کیم یاراتمشدر؟ الله. اللهه اطاعت  
 ایتک، اللهی سومک، اییلک ایتک بزم وظیفه مزدر. آنامزه  
 بابامزه قارشى وظیفه مز نه در؟ آنلری سومک، سوزلری  
 دیگمکدر. بشقه وظیفه مزده وارمیدر؟ اوت واردرد:  
 پادشاهمزى. مملکتمزى سومک، چالیشقان اولق.

— علوم مستعمله —

برنجی درس

ارض . مسکنمز . جغرافیا .

اوزرنده اوطوردیغمز دنیاڭ شکلی ، ییچیمی  
نصلدر بیلیرمیدسگن؟ دنیاڭز گولله ، قارپوز گبی یوار-  
لا قدر . کتایبگزده کی رسملره باقڭ . آنلرسزه گولله  
گبی یوارلاق اولان دنیاڭ یاریسنی گوستتر .

دنیاڭز اسمنه ارض دینیر . ارض پک بویوکدر  
اطرافی اون بیڭ میل ، سورر . چوجوقلر! بریرده  
طورمیوب ویرده یورییه جک اولسه گز آنجق اون  
سنه ده دنیاڭی طولاشه بیلیرسگن .

ارضڭ اوزرنده بش دانه قره پارچه سی واردر .  
آنلرڭ اسملری : اوروپا ، آسیا ، آفریقا ، آمریقا ،  
اوستریالادر .

اوزرئده بولنديغمز دنيانك قره لرني اوكرئ  
دگزلريني . گوللريني ،  
طاغلريني ، مملكترلريني ،  
بيلمك پك فائده ليدر :  
بزئ دنيانك قره لرني ،

دگزلريني . گوللريني ، شكل ۱ - ارضك برنجي نصفى  
طاغلريني . مملكترلريني بيلديرن علمه « جغرافيا » دينير .

## وظيفة ۲

ارضك بيجى نصلدر ؟  
دنيانك اطرافى قاچ سئنه ده  
طولاشيلير ؟ دنيانك اوزرئده  
قاچ قره پارچه سى واردر ؟  
اسملرى نئدر ؟ كئتابكزده كى

اوايكى رسم نئدر ؟ بويله رسملره شكل ۲ - ارضك ايكنجى نصفى  
نئدينير ؟ خريطه دينير . ايشته بويله خريطه لرده كره مسطحه  
دينير . خريطه نك اوزرئده كى بياض يرلر نئدر بيليرميسكز ؟  
قره اولان محللار . اسمر وچيزگيلى اولان يرلر نئدر ؟ دگزلر .  
دنيانك دگزلريني ، قره لرني ، طاغلريني ، مملكترلريني بيلديرن  
علمك اسمى نئدر ؟ جغرافيا ابي علم ميدر ؟

## اخلاق

— جناب حقہ قارشی وظیفہ لرمزدن —

۲ - دعا

چو جو قلم! آنا گز دن او شو دیگ گز وقت آتش،  
 آجیقدیغ گز زمان ییہ جک ایسته دیگ گز گی اللہ ندن ده  
 عقل، جسارت، چالیشقانلق، ایملک ایسته ییگز،  
 ییہ جک، ایچہ جک وجود گزہ نصل لازم ایسه  
 عقل، چالیشقانلق دخی ای آدم اولمگ گز ایچون  
 اوله لازمدر.

الله، ایملری سور، ای اولانلرک ایسته دیگنی  
 ویریر، سزده ای اولمغه چالیشک.

آنا گز هر ایسته دیگ گزی ویریر سه الله ویرمرمی؛  
 الله ای چو جغک گوزل صداسنی ایشیدر، ایملک ایتک  
 ایچون ایتدیگی دعای قبول ایدر.



## — علوم مستعمله —

### ایکینجی درس — دگزر

ارضك در تده اوچ پايي طوزلو بر صوايله قاپليدر .  
 بو صويك آدينه دگزر دينير .


ایکی قره پارچه سی آره سنده دگزر اولسه او قره لره  
 فصل گچیلیر ؛ انسا نلر دگزر لرده گز مك ایچون گمیلر  
 یامش لدر .

گمیلر ، تختیه دن ، دمیر دن یاپیلیر . دیرکلری  
 مناره گبی یو کسکدر . او دیرکلره یلک نلر آصیلیر .  
 آنلر آچیلنجه قناده بگزور .

### وظیفه — ۳

الله نه ایچون یالوارمالی ؟ عقللی چوجقلر نصل اولورلر ؟  
 خوش طبیعتلی چوجقلر نصلدر ؟ او قومغه ، یازمغه هوسی  
 اولان چوجقلر نصلدر ؟ نمازده جناب حقه نه ایچون دعا  
 ایدیورسکمز ؟

روزگار یلکنلری طولدیرر. ایترا گمی یی دگز



شکل ۲ — دگز اوزرنده گمی

اوزرنده یوریتور .

او قوجه دگز لر اوزرنده

گزمک ایچون انسانلرک

گوستردیگی جسارته شا.

شیلیر .

### وظیفه — ؟

دگز نه در؟ چشمه صولریله دگز صوبی آرمسند نه فرق



شکل ۳ — طائفه لر عملیاتده

وارددر؟ دگز لرده نه ایله گزیلیر ؟

دگزک بیوکلیگی نه قدردر ؟ گمی

گوردیگزمی ؟ صواوزرنده یایمه گمی

گزدیردیگزمی ؟ کتابک شکلرینه

باقک . گمینک دیرکلری ،

یلکنلری گوسترک ، آنلرک نه یه

یارادقلری سویلیک ، یلکنلری

طولدیرمق نه دیمکدر ؟

## — اخلاق —

## ۳ — بابا

کوچک چو جو قمر اوده اویناد قمری . بیوکری  
مکتبه گیتدکاری ائزاده باباده چولغنی ، چو جو غنی  
گچیندر مک ایچوز چالیشیر .

آقشام اوستی تارلاردن گلدیگنده پک یورغون  
گورینور . ایشته گلیور . اوک قپوسی آچیلدی . عجب  
ایک اوّل قوجاغنه آتیله جق چو جوق هانگیسیدر؛  
ایچلرندن بری بویننه آتیلدی . دیدی که :

— باباجم : چوق چالیشدم . او قدر چالیشدمکه  
صنفک برنجیسی اولدم . بیودیگم وقت سزه یاردیم  
ایده جگم .

بابا . اوغلنی باغرینه باصدی اوته کی چو جو قمرینی ده

سودی، او آنده یورغو نلغنی، گوندوزین چکدیگی  
زحمتی اونوتدی .

باباسنڭ یورغو نلغنی، کدرینی، چالشمه سیله، ای  
اولمسیله گیدرتن جو جو قلر نه قدر ای چو جو قلر در !

— علوم مستعمله —

اوچنچی درس — زراعت . صناعت .

چفتچی تارلارده چفت سورر . بغدادی اکر .  
بغدایلر اولنجه بیچر . بوگا زراعت {چفتجیلک} دینیر .  
دمیرجی دکانده دمیری قیزدیرر دوگر . ایسته دیگی

وظیفه — ۵

سنزی چالشمه سیله بسلین کیمدر؟ — بابا گز چالشمه جغه  
راحت اوطورسه نه اولورسه گز؟ — بابا گزک یورغو نلغنی  
کیدرتمک ایچون نه یایملیس گز؟



شکل ۵ — ترلا ایشی : اکین

بیچیمه صوقار . طوغرا .  
مه جی اودونلری اویار .  
چولخه جی بز اورر . بوکا  
صنعت دینیر .

تارالرده چالیشان چفتجی . دستکاهده چالیشان



شکل ۶ — دکان ایشی : طوغرامه . یلق

ایشیجی آنجق کندی چولغی .  
چوجفی . مملکتی ایچون  
چالیشیر . چالیشانلر نه قدر  
ای آدملر در !

## وظیفه -- ۶

زراعت نه در ؟ ترلا ایشلری فائده لیمدر ؟ چفتجی اکین  
اکمه بزم حالمز نه اولور ؟ هیچ اکین گوردیکزمی ؟ کتابک  
شکلنه باقک . اوراده چفتجی نه یاییور ؟ بغدادی یچمک ایچون  
قوللانیدی آلک آدی نه در ؟ یانی باشنده طوران نه یاییور  
بیلیر میسکیز ؟ دمت یاییور . صنعت نه در ؟ ایشجیلرک ایشلیدیگی  
یرلره نه دینیر ؟ دکان ، دستکاه دینیر . ایکنجی شکله باقک

— علوم مستعمله —

دردنجی درس — او



شکل ۸ — ایلک انسانلرک بر  
مسکین : مغاره



شکل ۸ ایلک اهلینک بر  
مسکین : چادر

دنیا ده ایلک یارادیلان  
انسانلر او یایمه سنی بیلمزلر  
ایدی . عجبا نره لرده  
اوطور لر دی ؟ یرالتنده  
اویولمش مغاره لرده چالی  
چیرپیدن یا پلمش کلبه لرده  
بزدن چادر لر آلتنده  
اوطور لر دی . مغاره لرده  
بیر تیجی حیوانلر ه راست

اوراده کی آدملر کیملر در ؟ طوغرامه جیلر . النده طو تدینی  
نهر ؟ دستره ایله تخنه طوقاق — دستره نه ایچون قوللانیلور ؟  
چکیچ نه ایچون قوللانیلور ؟



شکل — ۹ یانچ اوزره او

گلیرلر، آنلرله غوغا ایدرلر  
ایدی .

شمی بزم اولرمز  
وار . اولرمز تختهدن ،

طاشدن یاپیلیر . تختهدن اوه اخشاب بنا ، طاش اوه  
کارگیر دینیر . طاملرک اوزرینه کره مید قونور .  
بزده او طاملرک آلتنده ، اوک ایچنده اوطه دنیلن  
بولوکلرده یاتارز .

## وظیفه — ۷ —

ایلاک انسانلر نرهدن اوطورور ویا نارلردی ؟ مغاره نه در  
بیلیر میسکتر ؟ کلبه نه در ؟ چادر کوردیگنمی ؟ شکله کوستریلن  
چادره باقک . بو چادر ، بیوک وگر گین بریز اولوب قازیقلرله  
یره باغلانمشدر . بزم اولرمزک دیوارلری ، طاملری نه ایله  
یاپیلور ؟ اوچنچی شکل نه کوستر ؟ دیوارلرمزی یاپانلر نه  
دینیر ؟ دیوارچی ، اولرمزی یاپانلر نه دینیر ؟ قالفه ، دولگر .  
قبولرمزی ، دولاب کبی شیلرمزی یاپانلر نه دینیر ؟ طوغرا .

— اخلاق —

بشنجی درس — قرداش، همشیره

— شفتالی —

احمد . قومشوسی چفتجینک برایشنی گورمش  
ایدی . چفتجی آنک خدمتته مقابل کنیدیسنه  
قرمزی ، صولی بر شفتالی ویردی .  
احمد قوشمش ، صوصامش ایدی . آز قالدی او  
صولی شفتالی پی ییه جک ایدی . لکن ییه مدی .  
خاطرینه خسته اولان همشیره سی گلدی .  
شفتالی پی آکا گتوردی . دیدیکه :

مه جی ، اوه لازم اولان تحتهلری صاتانلره نه دینیر ؟  
کراسته جی .



— قرداشم . بگیا ویریلن بر شفتالی پی سگیا  
گتوردم . سنک اولسون .

احمدك همشیره سی شفتالی پی یالگزی میدی .  
یاریسنی احمده ویردی . ایکسی قارشولقلی اولد .  
قلری حالده اوصولی یمشی ییدیلر . ایکسی ده حظ  
ایتدی . انسانلر دائما بربرینه یاردیم ایتلیدر .

## وظیفه — ۸

احمدك شفتالی پی قیز قرنداشنه گتوردیگنی اینی بولیور -  
میسگیز : « بر برگزه یاردیم ایدك ، سوزینی آکلادیگزمی  
عجا احمد نه ایچون بوایلیکده بولندی ؟ اییلری سورمیسگیز ؟  
چفتیجی ، حظ کله لرینی ایضاح ایدك .

— علوم مستعمله —

آلتنجی درس — یمشله ینه جاک ، ایچیله جاک شیلر  
 شفقتالی ، آرمود ، الما ، کراز ، قایسی ، اریک ،  
 اوزم ، قارپوز ، قاوون گبی یمشله ری طانیر سگنر .  
 یمشله بزم حرارت می کسر . آنلرک چوغندن



نکل ۱۰ — باغ

بر طاقم ایچیله جاک ، ینه جاک  
 شیلر یاپیلیر . مثلاً ویشنه دن  
 اعلا شروب . رچل وقایسی دن  
 خوشاب یاپیلیر . اوزومدن  
 یکمز ، شیر ، حیقار ییلیر .

قوریسندن خوشاب پیشیر ییلیر .

میوه لرک اک فائده لیس اوزومدر .

اریکدن ، قایسی دن اعلا پستیل یاپیلیر . پستیل

ازیلیر . خوشاب گبی ایچیلیر .

## — اخلاق —

## — اوقويوب يازمه —

وقتيله احمد نامنده بر چوجق وار ايدى . دها  
 بش ياشنده ايدى . احمد هر زمان آناسنىڭ ياننه  
 اوطورر . كنديسنه طاتلى طاتلى حكايه سويله مسنى  
 رجا ايدر ايدى .

برگون آناسى ديدىكه :

— اوغلم ! الله اوڭجه دن حضرت آدمى ياراتدى  
 صوڭره حوّاى ياراتدى . انسانلر ك آناسى ، باباسى

## وظيفه — ۹

بيلديڭىڭىز بىشلىرى صايڭ . بونلرڭ رنكلرى نصلدر ؟  
 تعريف ايدڭ . آنلىرى حاصل ايدن آغاچلرڭ اسملىرى نهدر ؟  
 اوزوم نصل ميوهدر ؟ اوزومدن نلر ياپىلىر ؟ قايسى ، اريكدن  
 نلر ياپىلىر ؟ بىستىل نلر ؟ خوشاب نلر ؟



بونلر در . جناب حق بونلری جنته قويدی . لیکن  
شیطان ایکیسنی ده آلداتدی . اللهک یمیک دیه امر  
ایتدیگی یمشدن یمدیرتدی . بونک اوزرینه جنتدن  
چیقارلدیلر .

آنا . حکایه بی بیتیرنجه احمد دیدیکه :

— آنا جغم . سن حضرت آدمی گوردگمی ؟

— خیر ! چو جغم !

— او یله ایسه نره دن بیلورسک ؟

— کتابده او قودم .

برگون احمدک آناسی سوقاغه چیقدی . احمدک  
اوده جانی صیقیلدی . حکایه ارقومق ایچون دولابدن  
برکتاب آلدی . کتابی آچدی . ایچنده برطاقم سیاه  
چیزگیلر گوردی نه قدر آچدی ایسه هرا چیشنده  
ینه او سیاه چیزگیلری گوردی . جانی صیقیلدی .  
اویقویه یاتدی .

آناسی گلنجه :

— آناجغم ! سنك كىتاب دىديگك شىدن  
حكايله لرى نصل آكلامالى ؟ دىدى . آناسى ده :  
— اوغلم . او قويوب يازمق او گرنملى . دىدى .


— فنون مستعمله —

يدنجى درس — طاووق — يومورطه — جيو جيو  
يديگمز يومورطه لرى . يومورطالاياز طاووقدر .  
طاووغك يومورطه لرى آلماناسه قولوچقه يه ياتار

وظيفه — ۱۰

احمد نصل چوجق ايدى ؟ — آناسى آكلا نصل حكايله لر  
سويلردى ؟ حضرت آدم كيمدر ؟ آناسى طيشارى يه چيقينجه  
احمد نه ياپدى ؟ كىتابدن حكايه او گرنمك ايچون نه لازمدر ؟  
او قويوب يازمه نك دهان نه فائده سى واردر ؟

یومورطه لری یگر می برگون قنادلری آلتنده ایصیدیر.




شکل ۱۱ - قولو چقه

بوصیجا قلق ابله یومورطه.

لرک ایچنده کوچک کوچک

جیو جیولر اولور.

باقک! غاغلریله یومور.



شکل ۱۲ - جیو جیو

طه نك قابوغنی قیریورلر.


یومورطه دن چیقئورلر.

چیقار چیقماز آنالری نك

قنادلری آره سنه گیزلنیورلر.

اطرافمزد شاشیله جق.

نه قدر تحف شیلر وار!



## وظیفه — ۱۱

بزه یومورطه ویرن حیوانك اسمی نه در؟ قولو چقه یه

یاتمق نه دیمکدر؟ هیچ قولو چقه یه یاتمش طاووق گوردیگزمی؟

طاووق قاج گون قولو چقه یه یانار؟ یومورطه لر یخیوبده طا.

## جسارت

## — قاچمش آت —

بر جمعه گونی احمد، قیز قرنداشنی جامعدن گتیر.  
 ییوردی . سوقاغڭ نہایتہ گلدکلرنده دیزگیننی  
 قوپارمش بر آتڭ قوشدیغنی . آرقه سنندن بر طاقم  
 آدملرڭ باغردقترینی گوردیلر . احمد قورقدی .  
 لیکن قیز قرنداشنڭ کندیسنندن دها زیاده قورقد .  
 یغنی . آغلادیغنی ده گوردی . بونڭ اوزرینه :  
 — قورقه قرداشم . بن سنی چیگنتمم . دیدی .

ووعڭ آلتنه قونولسه یومورطه نڭ ایچنده نه حاصل اولور ؟  
 جیوجیولر یومورطه دن چیقماق ایچون نه یاپارلر ؟ یومورطه نڭ  
 قابوغنی نه ایله قیرارلر ؟ جیوجیولرڭ براز بیوکنه نه دینیر ؟  
 خروس ندر ؟

در حال قرداشنی بر قیونك ياننده طور دیر تدی .  
کندیسی ده آنك اوگنه گچوب طور دی .

کندیلرینه طوغری کلن آته النده کی مندیلی  
صاللادی . حیوان یولندن دوندی . هییچ بر ضرر  
ویرمیه رك گچدی . گیتدی .

کوچك قیز، سوينجندن باغرمغه باشلادی . احمد  
آنی قوجاقلادی . قورتولدقلری ایچون زیاده سیله  
سوینیورلردی .

احمد . کوچك براركلك اولمشیدی . زیراشمیدین  
قرداشنی محافظه ایده ییلمگه باشلامشیدی .

## وظیفه — ۱۲


جمعه ، نه در ؟ هفته نك گونلرینی سویلیك . کندندن  
کوچك قرداشلر ایچون بریـوك قرداش نه یایه ییلیر ؟ آنلره  
باقار . بر ضرر گلمسون دیه کوزه تیر . چالیشیر . چالیشقانلغی  
ایله آنلره اورنك اولور . جسارت گوسترر . آنلری قضادن



## — فنون مستعمله —


## سکزنجی درس — آت

آت انسانه پک فائده لی بر حیواندر . قوتلیدر .  
آغیر یوکلر چکر .



شکل ۱: آت

چوق قوشار . برسوا .  
ری بی . ویا بر یوکی سرعتله  
کتور رکن هییچ گورمد .  
یگزمی ؟



شکل ۱۵ - سوی

جسار تلیدر . محاربه لرده  
بیله قاچار .  
اطاعتلیدر . کندیسنه

قورتار . احمد نه ایچون کوچک ازک دیدک؟ انسان نه گی  
حاللرده بر برینه تشکر ایدر ؟

طیاق اورولمیان مملکتلرده صاحبنک سسنه کوپک  
گبی اطاعت ایدر. عربلر آتلی سربست براقورلر.  
کندیلرینه لازم کلنجه بر ایصلق چالارلر. آتلی  
در حال کلیر.

## اخلاق

بر چوجغک اییلگی — ناموس قناعت

برگون حسین آناسنک بویننه صاریلهرق :

## وظیفه — ۱۳

آت هانگی خدمتلرده قوللانیلور ؟ . . . یوک چکر .  
آدم طاشیر . عربه چکر . صپان سورر — کتابگیزک رسملرینه  
باقک . آتک باش طرفنده کی اوزون قیللره نه اسم ویریلیر ؟  
یله دینیر . آتک آغزی سیوریدر . آیاغی بر طرناقلیدر . آتک  
آیاغنه ( نعل ) اورورلر . آتک باغیرمسنه نه دینیر ؟ کیشنه مک .  
آت اطاعتلیمیدر ؟ عرب آتلی نصلدر ؟ عربلر نره درلر ؟

— آنه جگم آنه جگم، بزبو آنه قدر فقیر ایدك.  
شمدی زنگین اولدق، دیدی .

در حال جیبندن بر چانطه چیقاردی . ایچنده  
لیرالر وار ایدی . حسین حساب بیلدیگنندن  
صایدی . تمام سکسان لیرا وار ایدی .  
آناسی حسیننه صورددی ، دیدیکه :  
— بو پارهلری نره ده بولدك ؟

حسین جواب ویرهرك :

— آنه جگم . شوراده خندقدده اوینایوردم .  
برافندی یولدن قوشه رق گچدی . آلنك تیرینی  
سیلمك ایچون جیبندن مندیلمی چیقاردی . بو  
آرهلق توزلرك ایچنه برشی دوشدی .

بن خندقدن چیقدم . بوچانطه یی گورددم . فقط  
او افندی غائب اولمشیدی .

بنى كىمىسە گورمدى . چانطەي بولدىغمى دە  
كىمىسە بىلمىز ، ايشتە زىنگىن اولدۇق ، دىدى .

حسین سوينجىندن صيچرايوردى .

والدەسى آگا سرت ، سرت باقدى . دىدىكە :

— سنى كىمىسە گورمىدىمى ؟ يا اللە ...

چوچۇق قىزاردى .

— كىمىسە بىلمىز دىيورسۇڭ . ياوجدانۇڭ : سۇكا

گىجە . گوندوز بريسنىڭ مالنى بولان وانى صاقلان

خىرسىز دىگلىمىدۇر دىمىزمى ؟

چوچۇق باشنى اگدى .

— سىن بىزى بو آلتون ايله مى زىنگىن اولەجىز

صانىيورسۇڭ ؟ اولادم . بو حالده پىك فنى اولورۇ ،

زىرا دىنيادە بولنان خىزىنەلرۇڭ اڭ قىمتلىسى اولان

ناموسىمىزى غائب ايدىرۇ .

ہایدی چوجغم . چابوق گیت ، او افندی پی  
آرا . بولورسہک مالنی آکا ویر .

بولمازسہک چانطہ پی حکومتہ تسلیم ایدرز .

مالنی غائب ایدنلر اورایہ گیدرلر .

بو حالده بزده وظیفہ مزی یامیش اولورز .

حسین بوسوزن متأثر اولدی . آناسنی قوجاقلادی .

قوشہرق او آدمی بولمغہ گیتدی .

### وظیفہ -- ۱۴

قلم تراشکزی . کتابکزی غائب ایتسہکزی ، بریسیده آنی  
بولسہ سزہ گتیرسہ ممنون اولورمیسکزی ؟ بولدیغکزی شی سزک  
مالکزمیدر ؟ بولنان شیرلی نہ یاملی ؟ بولدیغکزی مالک صاحبنی  
بیلمزسہکزی نہ یاملی ؟ بولنان شیرلی بر ادم صاقلاسہ نہ یامیش  
اولور ؟ البتہ خرسزلاق . خرسزله نصل مجازات ایدیلیر ؟  
انلرہ خرسز دینیر . ناموسلری محو اولور . بر خرسزله  
آرقہ داش اولسنی ، انکله کزمننی ایسترمیسکزی ؟ خیر  
اوکی اسلاملرلہ گزمگہ اوتانیرسکزی چونکہ ناموسکزی

— علوم مستعمله —

طقوزنجى درس — قوشلارڭ فائدهسى



شکل ۱۶ — قوش بىواسى

قوشلار . يووالرىنى چاليلره  
ايلىشمش قوزى تويللىرى . چالى  
چىرپى ، يوصون پارچهلىرى ايله  
ياپارلار . باقك دنياده هيچ

واردىر . — ناموس نەدر بىليرمىسەڭىز ؟ ايله بر حس دركه  
بىزى وجدانمىزك اوڭىنىدە اوتاندىرمىز . بىزە هر ىردە اعتبار  
قازاندىرىر . ناموسلى بر آدم فقيرلىگى . سفالتى چكرده دنيانك  
پارەسى قازانەجقنى بىلسە يەنە خرسىزلىق ايتىز . — قىساعت  
نەدر ؟ قازاندىغىنە . الندهكى مالنە ، راضى اولوب بشقەسنىك مالنە  
گوز دىكمەمكىدر . — وجدان نەدر ؟ وجدان كىندى  
حسەمىزدەر ، نەپيارسەق او بىلير . قىتالىق ياپارسەق بىزە سويلر .  
بىزى اوتاندىرىر . اىيلىك ياپارسەق بىزە اىيلىك ياپدىڭىز سويلەرىك  
سويندىرىر .

برشی غائب اولميور . قوشلر ياورولريني بوجك :  
قورد ايله بسيلر .

اگر قوشلر اولمسه بوجكلرك . قوردلرك ايدە .



شكل ۱۷ — قوش

جكلري ضرري بيلير -  
ميسكز؟ آنلر باغچه لر مزده  
باغلر مزده نه قدر اكين  
وارسه جمله سني يرلر . خراب  
ايدرلر ايدى .

بونك ايچون قوشلري اولدورمك : يوالريني  
بوزمق اي دكلدر .

### وظیفه — ۱۵

يواگورد يگزمى؟ يوالر نلر ايله ياپيلور؟ قوشلر ياورولريني  
نلر ايله بسيلر؟ او قوردلري يينلر هانكى حيوانلردر؟ بوجك  
وقوردلر نه يرلر؟ آرمود، الماير ايكن ايچنده قورد كورد .  
يگزمى؟ قوشلر ، قورد وبوجكلري يمسه لر نه اولور؟ يوالري  
بوزمق ايبيدر؟

— اخلاق —

تمیزلك

تمیز بر چو جغی گورمك قدر ، خوش برشی  
اوله ماز . علی یه باقك : یوزی ، او قدر ، تمیز او قدر  
تمیزكه انسانك او قشایه جغی گلور .

حال بوكه پیس چو جو قدن هر كس نفرت ایدر .  
آنی کیسه سومز .

باقك شو كوچك زهرايه . یوزی كیردن گور-  
نمیور . صاحلری قارمه قاریشق تا گوزلرینه قدر  
دوشمش . بونی کیم سور ؟

یوزینی سیلمگه اوشندیگندن هر گوردن  
کندیسندن یوز چویریور .

دنیا ده پیس چو جق قدر انسانی ایگرندیور  
برشی یو قدر .



حال بوکه تمیزلك پك قولایدر . بر پارچه صو  
ایله وجودده کی پیدسلک گیدر .

انسان هرگون النی ، یوزینی ، آیاغنی . گوزلجه  
بیقامالی آبدست آلنیرکن بیقانان یرلر پیدسلک  
قالمینجه یه قدر تمیزلنلی .

سزی تمیزگورنلر . سورلر .

### { اخلاق }

#### اختیارلره رعایت

خالد برگون اوینک قیوسی اوکننده اوطورمش

#### وظیفه — ۱۶

تمیز چوجق نه دن بللی اولور ؟ کیرلی چوجق نصیلدر ؟  
تمیزلك نه ایچون لازمدر ؟ تمیزلك ایمیدر ؟ سز باغچه لرده گزن  
سموکللی بوجکلری گوردیگزمی ؟ طوقوتجه ال اوزرنده  
نهلر قالیر ؟ سویله جك چوجق نصل چوجقدر ؟

رسمی بر کتاب او قویوردی . اورادن گچن بیاض  
صاچلی بر اختیار ، الندن دگنگنی دوشوردی .  
خاله در حال کتابی براقدی . قوشوب ، دگنگی  
آلدی . دگنگ بویندن بیوک ایدی . یردن آنجه  
اختیاره ویردی .

اختیار خاله دیدیکه :

— تشکر ایده رم او غلم ! سز هر وقت بویله  
تربیه لی کر ملی اولک . کندیگزدن بیوگنه رعایت  
ایدک که سزه ده رعایت ایتسونلر .

## وظیفه — ۱۷

اختیارلره نیچون رعایت ایدیورسکمز ؟ زیرا آنلرک  
سردن زیاده عقلی ، تجربه سی واردر — تربیه نه در ؟ نزاکت  
نه در ؟ تربیه لی چو جق نصلدر ؟ کر ملی چو جق نصلدر ؟ انسان  
کندی نصل سودیریر ؟

## — اخلاق —

## صبح ایشی

ایشته شفق سو کیور؛ صبح اولیور .  
 چالشقان آری، آلتون گبی قنادرینی آچه رق  
 قووانندن چیقار. ویزیلدار گویا:

— ای کونش سکا تشکر ایدرم. سن، ایچندن  
 بال طویلایه جغم چیچکلی آچیورسک دیر .  
 آخورلرده بیوک اوکوزار بوگورر. گویا:  
 — ایشته گوندز اولدی. اکینجی قالدق. بغدادی  
 بیته جک تارلای سوره لم. دیرلر .  
 اینکلرده بوگورر. گویا:

ای چالشقان چفتجی قالدق. مرعاده اوتلامالی یم.  
 اوتلار ایسه م ممه لرم سنک چوجقلریگی بسلیه جک  
 سود ایله طولار. دیرلر .

دیدیگمز وجهله صباح اولنجه چالشقانلرڭ  
هپسى ایشلرینڭ باشنه گیدرلر .  
ای گوچك چوجق سنده بونلر گبی چالیش ،  
زیرا دنیا ده هرکس چالیشیر .  
چالیشمق سعادتدر .

— آری . اوکوز . اینک . —


آری

آریلرڭ صباحلین چیچکلرڭ اوزرلرینی اممەسى  
بال وبال مومى یایمق ایچـ وندر . آری چیچکلرڭ  
بالنى طوپلار ، قووانندن بال مومى یاپار .

وظیفه — ۱۸

شفق نەدر ؟ — آریلری ویزیلدارکن ایشـتدیگزمی ؟  
— اوکوزڭ باغر مسنه نه دینیر ؟ آچیلماق ، بیتمک نه دیمکدر  
سویلیک ؟ — سود نەدر ؟ — چالشقان کیمدر ؟ — دنیا ده  
هرکس نه یپار ! — انسانه سعادت ویرن نەدر ؟ ایش انسانى  
نه ایچون مسعود ایدر ؟ — زیرا ایش فائده لیدر .

آریلرک بالی ینیر . بال مومی ایله شمعە . موم  
یاپیلیر . قووانلرە چوق یناشمیک .  
زیرا آریلرک ایگنەلری واردر .  
انسانە سوقارلر .




شکل ۱۸ — قووان



شکل ۱۹ — آری

## — اوکوز —

اوکوزلر پک قوۋتلیدر . بویونلرینە بویوندروق  
طاقیلی اولدیغی حالده تار-  
لالرده صبان چکدیکلرینی  
گوردیکزمی ؟ اوکوزک  
اتی ینیر .



شکل ۲۰ — اوکوز صبان چکیور

او كوزك طانه نك دريسى آياق قابى ياپلىق ايچون  
اعلا { كاوساله } اولور .

او كوزك ايچ ياغي ايله گيجه لرى ياقيلان موم ياپىلىر .

— اينك —

اينك قايماقلى سود ويرر سود دوگوله رك  
تره ياغي چيقاريلير .



سوددن يوغورت پينير  
ياپىلىر .

تكل ۲۱ اشك چققي مەندەن - برد صاغيبور

وظيفه — ۱۹

آرى — آريلر ك اوينه نه دينير ؟ كتابده كى رسمه  
باقك. كورينن قووان دكلير — آريلر نرەدن كير — قووانك  
آلتىده كوردىگكئز كوچك دليكدن كير . قووانلر صماندن  
ياپىلىر . ايچندن بال آلتق ايچون ايكي قولپندن قووانك اوست  
طرفى قالديريلير — آريلر چيچكلرك باللرينى نه ايله امرلر ؟  
آغلرلنده كى خورطوم ايله — بوندن ماعدا چيچكلرك

## — علوم —

## چایر — قوری اوت



شکل ۲۲ — اوراچی چایر اوراقلیدر

چایرلرده بولنان اوتلر  
بیونجه اوراچی . آنلری  
اوراقله بیچر .  
بیچیلن اوتلری قورو -

ایچنده بولنان صاری توزلری ده آلرلر . کتابده کی رسمه باقک  
او آریدر . پنجهلرینه باقک . اوزرلری اینجه قیلرله قابلی .  
بو قیللر، چیچکلرک توزلرینی آلمغه یارار؟ بوندن ماعدا آریلرک  
پنجهلرنده جیلر واردر، بوجیلر ایچنده قووانه کتوره جکلری  
ذخیره بولنور؟

اوکوز — تارلارده اولکلری یایان هانکی حیواندر؟  
صبانی چکن هانکی حیواندر؟ — تارلارده چالیشان ادملره  
نه دینیر؟ قوندیره یایانلره نه دینیر؟ میشین کاوساله نهدر؟ حیوانلرک  
دریلرینی کاوساله یایانلر هانکی اصنافدندر؟ انلره دباغ دینیر .  
موم نهدن یاپیلیر؟

اینک — صباحیلن ایچدیگکز سودی هانکی حیوان  
ویریور؟ تره یاغی نهدن یاپیلور؟ پتیر نهدن چیقاریلیر؟



شکل ۲۳ — بشاقچیلر اوت قوروتیور

تورلر. آکا قورو اوت دینیر  
قوری اوتلری دمتلرله انبارلره  
طولیدیرلر ایشته بو قوری  
اوت آتلره، اوکوزلره اینکلره  
یدیریلیر .

## وظیفه — ۲۰

چایر نه در؟ — چایرلرده بیتن اوتلری نه یاپارلر؟ برنجی  
شَکله باقک . او آدمه نه دینیر؟ اورا قچی نه یاییور؟ النده کی  
آلتک اسمی نه در؟ ایکنجی رسمده کی آدملر نه یاییورلر انلر  
اوتلری قورو تمق ایچون چویریورلر — اوت قوروینجه  
نه یاپارلر؟ اتلر، اوکوزلر نه ایله بسیلنور؟ اوت نباتیدر حیوانمیدر؟  
نبات نه یه دینیر؟ نبات دیه حرکت ایتمدکلری حالده یشایان آغاج  
واوتلره دینیر. حیوانات هانکیلریدر؟ آت کویک کدی، انسان  
کبی حرکت ایدن جانلی شیلردر . طاش طوپراق دمیر طوز .  
کوکرت کبی جانسز اولان شیلرله حیوانات و نباتات، دنیانک  
اوج بیوک «زمره» سنی تشکیل ایدرلر که انلره «زمره حیوانات،  
«زمره نباتات» و «زمره جمادات» دینیر .



— نزاکت، کرم، مرحمت —

بر ساعته اوچ اییلاک

— ۱ —

احمد کوپلی بر چو جق ایدی . بر گون بر ایش  
ایچون یقینده کی دگرمنه گیدیوردی . یولده قارنی  
آج . سقط بر اختیاره راست گلدی .

احمد . اختیارک سفالت حالنی نه ایله تسلیه  
ایده جگنی دوشونیوردی . کندی کندینه :

— آنامک ویردیگی اتمگی بیتیردیگمه نه قدر

جانم صیقیلیور دیدی .

او ائناده اختیارک اوگندن کمال حرمتله گچدی .

سقط اختیار ایسه :

— چو جغم سن بر اختیاره حرمت ایتدیگک

ایچون الله ده سنی عزیز ایتسون دیدی .

احمد نزاكتنك اختیاری سویندیردیگنه  
سوینه رك يولنه دوام ایتدی .

— ۲ —

احمد دگرمنه یاقلاشنجه چالیلغك آره سندن بر  
طاووق چیقدیغنی گوردی .

چالی یه گیره رك یاپراقلا آره سنده سکز دانه  
ایری یومورطه نك صاقلی اولدیغنی گوردی .

درحال دگرمنه گیردی . دگرمنجی یه سلام  
ویردی . سویلیه جگی سوزی سویلیدی . اوآراق :

— دگرمنجی بابا، شوراده . شوچالیلق آره سنده  
طاووقلا گزدن برینك یومورطلامش اولدیغنی سکز  
یومورطه یی گوردم . دیدی . دگرمنجی یی برابر  
آلوب چالیلغه گوتوردی .

دگرمنجی . احتمال که غائب اوله جق اولان اوسکز  
یومورطه یی بولنجه ممنون اولدی . احمده فرونده  
تازه پیشمش برصومون ویردی وچوجفه :

— ایشته اوغلم سنڭ کر مکه قارشى بنده سڭا  
بونی ویریورم دیدی .

— ۳ —

دگر منجینڭ ویردیگی صومون او قدر گوزل  
قو قیوردیکه احمدڭ ییه جگی گلدی .  
لکن بردنبره یوله کی اختیار خاطرینه گلدی .  
کندی کندینه :

— او دها یمک یمه مشدر . بوصومونده آنڭ  
قارنتی طویوره بیلیر . دیدی .  
بونڭ اوزرینه اختیاره یتیشمک ایچون آلا بیلد-  
یگنه قوشمغه باشلادی .

آره سی چوق کچه دن آڭا یتیشدی . صومونی  
النه ویردی .

اختیار . چو جفڭ بوا ییلکندن او قدر متأثر اولدیکه  
هم تشکر ایتدی همده گوزلرندن یاش آقتیدی .

ایشته احمد بو وجهله. بر ساعت ایچنده هم نزاکت  
هم کرم. همده مرحمت گوستردی.

— علوم —

اون — اتمک

تار لالارده کی بغدادیلری گونشک صیجاقلنی صا.  
رار تدینی واولدینی زمان آنلری بچر لر. دانه لرینی  
چیقار مق ایچون باشاقلرینی خرمن ایدر لر.

وظیفه — ۲۱

انسان بر ساعت ایچنده بر چوق ایلیک یا به بیلیرمی؟ سقط  
کیمدر. بیلیر میسگز؟ احمد. اتمکنی بتیردیگنه نیچون تأسف  
ایدیوردی آکلادیگنزمی چوجقلا راست کلدکری اختیار.  
لره فصل حرمت ایدر لر؟ انسان غائب اولمش بر شی بولسه  
نه یا بیلیدر؟ بویله بر شیئی مکافات اومقسنزین خبر ویرمک  
وظیفه دکلیدر؟ احمد نه صورتله مرحمت گوستردی؟ مرحمت  
فضیلت میدر؟ فضیلت نه در؟ ایلیکلرک اڭ بیوکلرینه فضیلت  
دینیر.

صوگره چىقان دانەلرى دگرمنە گىتوررلر . دگر-  
منك دونن بيوك طاشلىرى او بغدايلرى ازى .  
اوگوتور . اون ياپار .

اون وصو ايله خىر ياپىلىر خىر فروندە پىشىرىلەرك  
اتمك چىقاريلير .

اتمك انسانلرك اڭ برنجى يىە جگيدر . براتمك  
پارچە سنى غائب ايتىگىز . زىراسىزك ياشگىزدە اويلە



آدملر اويلە چو جقلر واردرکە  
يىە جك اتمكلىرى يوقدر .  
فقرايە ويريلن برديلم اتمك  
اڭ بيوك ايدىلەر دن صايىلىر .

شکل ۲۲ — بغدايى دوگيورلر

## وظیفه — ۲۲

بوغدايك باشاغنى كوردىگىزمى ؟ كىتابدەكى رىسمە باقڭ --  
بوغداي نرەدە بولنور ؟ باشاغك كوچك دانەلرى اىچىندە  
بولنور ؟ باشاغك دانەلرىنك چىقارلدىغى محلە نە دىنىر ؟


— علوم —

بوز — قطبلر — نقاط اصلیه — قیزاقلر —

رنلر — لاپونلر

۱ — قطب بوزلری . نقاط اصلیه .

هوا پك زياده صوغوق اولديغى . قار ياغديغى



شکل ۲۶ — بر دگر منك انچریسى



شکل ۲۷ — فرونجی اتمك پيشيریور

خرمن — بغدادی نه ایله دوگرلر؟ . . . . دگرمن گوردیگزمی  
بر دگرمنی قوللانان آده نه دینیر؟ صو دگرمنی گوردیگزمی؟  
یل دگرمنی گوردیگزمی؟ اتمك نه ایله یاییلور؟ اتمك یاپان  
اصنافه نه دینیر؟ بوغاچه کبی شیلری یاپانلره نه دینیر؟ اتمك  
نرده پیشیریایر؟ شکله کوستریلن فرونجی نه ایله اوغراشیور؟  
النده کی بیوک کورک ایله اتمگی فرونه یرلشدیریور . بر دیلم  
اتمکی نه ایچون غائب ایتیمه جکسکیز؟

زمان صولرک کولرک، چایرلرک طوگدیغنی بیلیرسکیز

قطب شمالی

حتی اولرک طاملرندن

سیوری سیوری بوزلر

آشاغی یه طوغری صارقار

ارضک ایکی نهایتنه قطب

دینیر اوراده بولنان دگزلر

کاملأ بوز طوتمشدر .

شکل ۲۸ - ارضک قطبلری و قاطع اصالیه  
قطب جنوبی

اورالری زیاده سیله صوغوق اولدیغندن او بوزلر

اصلا اریز . او طوگمش دگزلرک نره ده اولدیغنی

بیلیمک ایسترمیدسکیز ؟

کتابده کی خریطه یه باقلک . خریطه نک یوقاریسند

« قطب شمالی » آشاغیسند « قطب جنوبی » یازیلیدر .

ایشته اورالرده کی دگزلر طوگمشدر . صاغ طرفه

شرق دینیرکه گونش صباحلین اورادن طوغار .

صول طرفه غرب دینیرکه گونش آقشام اوسقی

او طرفدہ باتار . ایشته شمال ، جنوب ، شرق ،  
غرب . بونلرہ « نقاط اصلیه » دینیر .

۲ — بوز قیزاقلری ، رنلر .

لاپونیاگی قطبہ یقین اولان شمال مملکتلرندہ  
بوز چوقدر . اورادہ کی انسانلر بوزلر اوزرندہ  
یورومک ایچون قیزاق دینلن عربہلر یامیشلردر .  
آت ، بویله صوغوق مملکتلردہ یشایہ مار . آنک



شکل ۲۸ قیزاق

یرینہ اورالردہ یشایان  
وآدینہ رن دینلن گیگلر  
قولالانیلور .

« رن » پک فاندہ لی بر

حیواندر . آتدن زیادہ قوشار برکونده اوتوز میل  
آلیر ، اتی ینیر . دیشیسنک سودی واردر . لاپونیا  
اھالیسی آندن پنینر یاپارلر .



## — علوم —

## بیوک قرداشک درسلی

## ایلك بهار — مواسم

قرداشلر . بیلدکلر گزی بربریگزه اوگره تئک ؛ بیوکلر

## وظیفه — ۲۳

یومورطه نئک باشی و قیچی گبی اولان ارضک ایکی نه-ایتنه نه آد ویرمشلردر ؟ ایکی قطبک ده اسملرینی سویلیک . نقاط اصلیه قاچ دانهدر ؟ بر صباح قیرده بولنسه گز نقاط اصلیه دن هر بری بولمق ایچون نه پیارسکیز ؛ اولا صاغکزی کونشک طوغدینی طرفه چویررسکیز . بو نقطه نئک اسمی نهدر ؟ — بو حالده صاغکزه گلن طرف شرق ، صولکزه گلن طرف غربدر . اوک طرفکزه گلن طرفک اسمی نهدر ؟ آرقه طرفکزه گلن طرفک اسمی نهدر ؟ دنیانک ایکی اوجنده بولنان دگز فصلدر ؟ ۲ — قطبه یقین مملکتلرده بوز اوزرنده فصل یورییورلر ؟ قیزاق نهدر ؟ شکله باقک . قیزاغی چکن حیوانک آدی نهدر ؟ رنک باشنده کی شیلر نهدر ؟ گیگک باشنده کی بوینوزلر گبی بوینوز . لاپونیا نه طرفدهدر ؟ بیلیمیسکیز ؟ لاپونیالیر اوزون بویلمیدر ؟ خیر قیصه بویلیدر . ممکتلری صوغوق اولدیغندن حیوان دریسی گینیرلر .

زیاده بیله جگنندن کو چکارده بوسایه ده بیلمدکاری نی  
اوگره نورلر .

بر کون علی کو چک قرداشیله برابر بر کویه  
کیدییوردی علینک کو چک قرداشی محمد . دیدیکه :  
آه ! قرداشم او تیر ایچنده بیتن شو کوزل چیچکاره  
باق هگبه کی براق ده آنلری طوپلایه لم . ایکسییده  
طوردی محمد چیچکاردن بر دمت یاپدی .  
علی بونک اوزرینه دیدیکه :

— محمد قرداشم گچنلرده چقد یغمزده بورالرده  
هیچ چیچت یوق ایدی . نه دن ؟ بیلیرمیسک ؟  
خیر .

— زیرا او وقت قیش ایدی . خاطر یکه گلیور می ؟  
هواده یک صغرق ایدی . شمدی ایسه ایلک بهار گلدی .  
علی سنه ناک درت موسمنی اوراده محمد آ کلاتدی  
محمد ده بیلمدیکی شیلری اوگر ندیگی ایچون . سونیور

ایدی حتی یولده صیچرایه رق : سنه ده درت موسم  
 وار ایمش برنجی موسم ایلك بهار ایمش . اوزمان  
 چیچکلر آچیلیر مش . ایکنجی موسم یاز ایمش او وقت  
 ا کینلر اولور مش . بچلیر مش .

اوچنجی موسم صوڭ بهار ایمش صوڭ بهارده  
 باغلر بوزولور مش .

صگره قیش گلیر مش . قار یاغار مش سنه ده تمام  
 اولور مش . شمدی او بر ایلك بهار کلیر سه بر یاشنه  
 دها گیره جگم . دیمک که آلتی یاشنده اوله جغم  
 او وقته قدرده دها عقللی اولورم . او قویوب یاز مق  
 او گره نیرم دیه سوینیوردی .

## وظیفه — ۲۱


بیلمدیگنلر شیلری او گره نیرسه گز ممنون اولور میسکنز ؟  
 او گرنمگه هوسکنز وارمی ؟ بونک ایچون نه یاملی ؟ سزه  
 ویربلن درسلیر دقنه دیگله ملی . سنه ده قاچ موسم واردر ؟

— علوم —

— گوندز — گيجه —

— ۱ —

ارض، بزه طور ييورگي گورينيور. لکن هيچ



طور ميه رق دائما كندى  
اوزرنده دونر . او دونر  
بزده . تارالار مزده اولر .  
مزده ، آنكله برابر دونرز .


نكحل ۲۹ — كره ارض ايله كونش

رسمده كي شو ايري گولله يه باقك . او اوزرنده  
بولنديغمز ارضي تصوير ايدر . بو حالده ارضك  
ياريسنى كونش آيدينلا تمش اولديغنى قبول ايدك . ايشته

سويليك شمدي هانگي موسمده يز ؟ بوندن صوكره هانكي  
موسم واردر ؟ هر موسم نه قدر سورر ؟ اوچ آي . سنهده  
قاج آي واردر ؟ سنهده اون ايكي آي واردر . اسملريني  
صايك : مارت ، نيسان ، ميس ، حزيان ، تموز ، آغستوس ،  
ايلول ، تشرين اول ، تشرين ثاني ، كانون اول ، كانون ثاني ، شباط .

ارضانك او پارلاق یری کوندوز اولمش دیمکدر .  
فقط دیگر یاریسی قراگلق . اوراسیده گیجه .

ارض کندی اوزرنده دونرکن اوطوردیغمز  
مملکت کونشه قارشى کلیرسه بزم ایچون کوندوز  
اولوردنیانك اوبریاریسنده بولنانلر گیجه ایچنده بولنور



لکن دنیا ویره دونر . یواش  
یواش کوندوزمن گیجه اولور .  
دیگرانسانلرک بولندقلری محله ده  
کوندوز اولور .

شکل ۲۰ اره مصغه

گیجه کوندوز یگر می درت ساعتدر . ایشته  
دنیا نك کندى اوزرنده بر کره دونمسی ایچون  
صرف ایتدیکی زمان بویگر می درت ساعتدر .

— ۲ —

سنه

ارض کندى اوزرنده دوندیکی حالده برده .

کونشک اطرافنده دوزر . فقط کونشک اطرافنی  
تام بر سنه ده دوزر .

برسنه اوچیوز آلتش بش کوندر .

اگر شمدی آلتی یاشنده ایسه کزیدی یاشنه کیر .

مه کز ایچون ارضک بر دفعه کونش اطرافنده یعنی اوچ  
یوز آلتش بش کره کندی اوزرنده دوزر نسی اقتضایدر .

### وظیفه — ۲۵

گوندوز — کیجه — ارضک بجمی نصایدر ؟ کره ارضی  
کوستر بر شکل وارمیدر ؟ کتابده کی ایکنجی شکله باقک .  
صنفده بر کره مصنعه وارمیدر ؟ ارض دوزر می ، طوررمی ؟  
طوباج جویردیگنکز وقت طوباجک کندی اوزرنده چابوق  
چابوق دوندیگنی کوررسنکز . ارضده گوکده بویله دوزر  
فقط طوباج کندی اوزرنده بر نایه ده دوزر . عجیبا ارض قاج  
ساعتده دوزر ؟ گوندوز نهدن اولور ؟ کیجه نهدن اولور ؟ اوروپاده  
گوندوز اولدینی وقت آمریقاده و آسترالیاده کوندوز اولورمی ؟  
سنه — سنه نهدر ؟ ارضک کونش اطرافنده بر دفعه  
دوزر ایچون صرف ابتدگی زماندر . بر سنه ده قاج کون  
واردر ؟ بر سنه ده قاج هفته واردر ؟ بر هفته قاج کوندر ؟  
بر آی قاج کوندر ؟

## — اخلاق —

مسرور اولمه نك چاره سی

بر زمان بر چو جق وار ایدی که مسرور گورینور .  
اصلا آغلامازدی ،

آنی هر کس سور ایدی آنی هر کس قوجاقل .  
مسنی ایستردی .


بو قدر مسعود اولان چوجغاك اسمنی اوگر نك  
ایسترمیدسگز .

شمدی اسمنی سزه سویلرم . . . ایسترسه گز  
بو چو جق سز اوله بیلیرسگز . بونگی چون یایدیغگز  
شیلره غایت دقت ایدك . بو حالده چالشمق سزه  
کوج گلمز سزده بتون کون مسرور اولورسگز .  
هر کس حقنده یواش طاورانك لطف ایدك .  
هر کسده سزی سور .

— علوم —

کلبک . ایپک بوجگی

یازین اوتہ ده بروده اوچوشان کلبکیر یومور -  
 طلارلر . آنلرک یمورطه لرندن قوردلر طرطیللر  
 چیقار . لیکن بونلرک جمله سی مضر تلیدر . ایچلرندن  
 یالکیر برینگکی فائده لیدر  
 اوبوجگه «ایپک بوجگی»  
 دینیر .



شکل ۲۱ - ایپک بوجگی


بو کوچک قورد ،  
 اورومجک آغنی اوردیگی  
 گبی اوده کندینه مخصوص  
 آغ اورر . بو آغک تللری ایپکدر .

وظیفه - ۲۶

انسان مسرور اولمق ایچون نه یاملی ؟ انسان کندینی نصل  
 سودیریر ؟ لطف نه در ؟ مسعود نه دیمکدر ؟ آنا بابا کیمدر ؟



صوگره بو ایپکدن اوربالر . شریدلر . بویون  
باغلری قاشلر یاپیلور .




شکل ۳۲ - صوگره

بوکو چک بو جکک نصل  
ایپک اوردیگنی بیلیر -  
میسکیز ؟

کندیسنه یوشاق بر

یووا یایمق ایچون او یووا یی کندی اوزرینه اورر .



شکل ۳۳ - یووا

ایچنده کیزلنیر . او یور

آنک یوواسنک اسمنه

قوزه دینیر . ایچنده

تام یگر می گون یاتار

یگر می گون صوگره کلبک اولدیغی حالده چیقار .


## وظیفه — ۲۷

کلبکارک یومورطه لرندن نه چیقار ؟ انسانلر ایچون فائده لی  
 بر بوجک سویلیک . ایپکدن نه لر یاپیلور ؟ — او کوچک  
 بوجک یوواسنی نه ایله اورر ؟ دیکلیک . آنک آلت دوداغندن  
 قویو بر صو چیقار . بو عادتا سالییا کییدر . لکن بوجک آنی  
 اینجه ایپاک کی چیقارر . هوایه چیقنجه اول ساعت قورور  
 ایشته بو ایپکدر . ایپک بوجکی نه قدر یرسه او قدر زیاده سالییا  
 چقارر . او قدرده ایپک یاپار . اوردیگی وقتدهده چوق یر .  
 ییدیگی شی نه در بیلیرمیسکیز ؟ طوت یاپراغی . ایپک بوجکی  
 نه ایله اورتونور ؟ قوزه ایله . رسمه باقک . بوهر طرفی  
 قپالی بر ایپک یوماغیدر . ایپک بوجکی یکریمی کون ائناسنده  
 بو یوماغک اورته سنده نه یاپار ؟ قوزه نک ایچنده نه وقت بر  
 دلیک دلر واورادن چیقار ؟ بو بوجک او وقت نه اولور ؟  
 ایچنده صاقلی اولدینی قوزه یی دیشی ، پنجه یی اولیان بر بوجک  
 فصل دلر بیلیرمیسکیز ؟ بیلیمورسه گز سویلیهیم : کوزیله دلر .  
 کلبگک کوزنده سیوری واینجه بر بوینوز واردر . آنی دستره  
 کی قوزه نک اوزرینه سورر . دلنجه یه قدر اوغراشیر . او وقت  
 دلیگی بو یولتیر . باشنی چیقارر . صوگره وجودینی صیغدیرر .  
 ایشته بوندن صوگره قوزم سندن چیقار . قنادلرینی آچار .  
 باقک دنیا ده نه تحف شیلر واردر ! جناب حقک شاشیله حق  
 نه قدر اثری واردر !

## — اخلاق —

## مکتب

مکتبه کیتمسنی پک سورم . بن دها کوچکم  
 لکن خواجهم بکا بیلمدکلمی اوگره تیر . گچن  
 زماندن استفاده ایدرم . بیوک آذم اولمشم کبی چالیشیرم .  
 بن دها برشی بیلمیورم . اوگر نمک . ایی اولمق ،  
 اللهی سومک ایسترم . چالیشیرسه چابوق اوقورم .  
 اللهه قوللق ایدهرک ایی قلبلی برآدم اولورم .  
 بن مکتبی سورم . زیرا اوراده چوق شی  
 اوگره نیلیر ، خواجه می ده سورم . چونکه او بکا  
 چوق شی اوگره تیور .



## وظیفه — ۲۸

مکتبه کیتمسنی نه ایچون سویورسکیز ؟ سزه برشی  
 اوگره تنلری سورمیسکیز ؟ چوجقلری بیوک آدملره بکزه تن  
 ندر ؟ — آرزو ایله چالشمقدر . انسان مکتبه اییی اولور ؟

## — وطن — عثمانلی دولتی —

بزم دولتمزك آدینه «عثمانلی» دینیر. بواسم بزه  
 سلطان عثماندن یادگاردر. سلطان عثمان، برنجی  
 پادشاهمزددر. بزه ده عثمانلی دینیر. عثمانلی مملکتلری  
 بزم وطنمزددر. یگر می سکز ملیون عثمانلی وارددر.  
 عثمانلی دواتمك پای تختی استانبولدر. مشهور شهرلری  
 روم ایلیده ادرنه، سلانیک، آناتولیده ازمیر، شام  
 ارضروم بغداددر. عربستانده ایکی مبارک شهر  
 دهها وارددر. آنلرده مکه ایله مدینه در.

آناتولی روم ایلیده بغدادی چیقارکه آندن اتمک  
 یاپیلور. زیتون چیقار آندن زیتون یاغی یاپیلور.  
 عثمانلیلر پک بیوک برملتدر. آنلرک اڭ بیوگنه


اوت ادراده انسان علم اوگره نور، علمده انسانی ای ایدر.  
 خواجه گزی نه ایچون سویورسکیز؟ زیرا اوسزه تربیه، علم  
 دینلن شیلری اوگره تیور.

پادشاه دینیر. چو جو قتل! بر انسان پادشاهی وطنی  
سوملی. سومین نانکوردور.

— علوم —

کاغذ

کتابگز، مجموعه گز، بیاض یا پراقری نه ایله



شکل ۳۵ — کاغذ ماشین


یاپیلیر بیلیر میسگز؟ اسکی  
پاچاورالردن. صماندن،  
ویا خود درلو درلو قوری  
نباتاتدن یاپیلیر. بونلرک

جمله سنی خیر ایدیورلر. بو خیری بیاضلاتیورلر.

وظیفه — ۲۹

بزم دولتمزک آدی نهدر؟ — سلطان عثمان کیمدر؟ —  
بزم وطنمز نره لیدر؟ قاچ ملیون عثمانلی وارددر؟ عثمانلی دولتمزک  
پای تختی نره سیدر؟ مشهور شهرلری هانگیلیدر؟ آناطولییده  
روم ایلییده نهر چیقار؟ عثمانلیلر فصل ملتدر؟ پادشاه کیمدر؟

بعده او قلاوه، گبی قالین مردانه لر له اینجه طبقه حالنه  
گتیریور لر. او وقت قورسوز دیه براقیور لر. ایشته  
بو کاغد اولیور. اوزرینه بیوک مطبعه ماکنه لر یله  
جرف باصیلان او بیوک صحیفه لر ایشته بو کاغددر.



— اورمان — جنا — حقک اییلگی —

آنا گل چو جغم! سنگله شو یقین اورمانه  
قدر کیده لم.

باق شو گوزل میشه لره. یاپراقلری انسانه کیف  
ویرن گولگه لی آغاچلره! دالارنده نه قدر قوش وار!  
هپسی شاقر شاقراوتیور! یاپراقلرینک اوزرنده نیجه  
آلتون رنکلی سینکمر او چوشیور. آنلرک آیاقلری  
پادشاهی، وطنی سومین نصل آدمدر؟ نانکورلر نصل آدمدر؟  
نانکورلر کندیلرینه ایدیلن اییلکی بیلمیوب آکا قارشی فنالق  
ایدنلردر. بو طبیعتده اولان انسانلر آلچق آدملردر.

آلتندە دها يىڭى آچىلە جق ياپراقچىقلار صولىور .  
 ھايدى اورمانك ايچنە قدر كىدەلم . تا شورايە ،  
 تا اورمانك صىق محلنە باق ياپراقلك آره سىندە برشى  
 قىمىلدايور .



شكىل ۳۰ — اورمان

دىگىلە اوراق بر گوردواتى  
 ايشتمىيور مىسك ؟

چو جق — اوت ، آنا جىم .  
 ايشىدىيورم ، گورىيورم ، باق

آنا جىم شو گوزل گوزلى حيوان نە در .  
 والدە — دىشى گىك . قورقاق گىك ايشتە باق

### ۳۰ — وظیفه

كاغد نە دن ياپىلار ؟ كاغد بايىلە جق اسكى باچاورلرى ، صمانلىرى  
 قورومش نىبانانى نە ياپيورلر ؟ كاغد اولە جق خمىرى اينجە طبقە  
 ياپىق ايچون نىصل ياصىلاتيورلر ؟ نىكلە باقك . ايكى مرزانه  
 آره سىندە عملەنك چكوب چىقاردىغى او بىوك كاغد نە در ؟  
 كىتابلر گىزك باصىلدىغى يره نە دىنير ؟ مطبوعە .

اڭ اوفاق گورلتیدن صیچرایور. یاورسی . اوراده  
چاللیق ایچنده یاتیور .

چوجق — اوزم سوزلر مزی ایشیدییور قورقیور .  
آنا — اوت قورقیور یاوروسی ایچون قورقیور .  
باق آنی داللرک اڭ صیق طرفنه صاقلایور آنی مدافعه  
ایتمک ایچون هر درلو فدا کارلغی گوزه آلدیره جق  
آوجیلر آنی صیقیشدیرنجه گوپکاره باش طوتار .  
یاره لننجه وجودندن قان آقوب یاوروسنی محافظه  
ایده میه جک حاله گلنجه چوکر ، او وقت یأسندن  
او گوزل بیوک گوزلرندن یاش آقار .

او غلم حیوانک قلبنه بیله بومر حمتی بوشفتی ویرن  
کیمدر ؟ بیلیر میدسک سنی سومک ایچون سکا آنا  
بابا ویرن الله در . الله اییدر . آنا ایلگی بیتمز .



— علوم —

— اورمانده بولنان نباتات وحيوانات —

۱ — اورمانده بولنان نباتات —

انسانلر اورمانلرده بولنان صاغلام کوتوکلی  
بيوك آغاجلردن پك چوق استفاده ايدرلر .



ايشته اودونجي : بالطه سيله ايرى  
چاملردن اودون كسيور .

بو چاملرله ، دستره جي كراسته ،  
كراسته لرله طوغرامه جي ماصه ، اولر

شكل ۳۶ - ميشه

ايچون دولاب ، مكتب ايچون وحله وصره ياپار .

آدى نه در ؟ شكه باقك — ميشه قابوغي نه يه يارار بيلير ميسكز ؟  
آنى ازدرلر . حيوان دريلرينى آنكله تربيه ايدوب ميشين  
ياپارلر ! حيوانلرلك آغلادقلىنى كوردىكز مى ؟ خير ، آغلامق  
حيوانلرلك عادتى دكلدر ، جيلان مستنادر ، اڭاينى ذات كيمدر  
اللهى سورميسكز ؟ آنك وىردىكى نعمتله شكر ايتمكى  
دوشونورميسكز ؟

## ۲ — اورمانده بولنان حیوانلر —

اورمانده درلو درلو حیوانلر بولنور. اڭ چوق  
بولنانی واڭ بیوک حیوانی گیک ایله دیشیدسیدر .



شکل ۴۷ — گیک

جیلان قره جه گیکه  
بگزر. فقط آنلر کوچکدر  
بولر اوتلری . آغاچلرک  
تازه بیتن دالری نی یر .

قورد ایله تلکی ات یر . بولر سوریلره ،  
کومسده کی حیوانلره صالارلر .



شکل ۴۸ — تلکی

## وظیفه — ۳۲

اودونجی ، کیمدر؟ آغاچلری  
کسمک ایچون قوللانیدی  
آلتک اسمی ندر؟ آغاچ کوتوکلرینی کراسته یایان کیمدر؟

## — اخلاق —

## — ای خویلی اوله لم —

وقتيله برچوجق وار ایدی که طبیعتی غایت فنا  
ایدی اولیه جق شیئه طاریلیردی .

آرقداشلی آنگله قونوشماز اولدیلر . گیم بیلیر  
نه قدر جانی صیقلدی .

برگون ، شو آشاغیده کی حکایه بی او قودی . گویا  
آنگیچون یازلمش ایمش .

کراسته ایله پاپیلان شیرلک برقاچی صایک ! اورمانک اک بیوک



حیوانلری هانگیلیریدر ؟ گیک  
جیلان ، قرهجه نه ایله یشار ؟  
سوریلره صالدیران وحشی  
حیوانلر هانگیلیریدر ؟ طاوقلره  
کومس حیوانلرینه صالدیران  
هانگیلیریدر ؟

{ حکایه }

— گرپی —

گرپی اورمانده یالکز قالمش ایدی . دیکنلرینی  
طوپ ایدوب بوزولمش . یالکزلغنه جانی صیقلمش  
ایدی .

برگون اوکنندن گچن اورمان حیوانلرینه دیدیکه :  
— دوستلرم ! بنمله نه ایچون اوینامیورسکمز ؟  
طاوشانلر آکا شو جوابی ویردیلر :

— سن پک فنا ارقداشسک . بورنمزی برآز سکا  
طوغری اوزاتسه ق دیکنک باتار . بریسی سکا  
پنجه سیله طوقونسه اورایی ده دیکنک صوقار . بو حالده  
سن دیکنکله قال . بونک گبی انسانلرکده گرپی کبی  
دیگنلی طبیعتلری واردر : هرگس آنلردن قاچار .  
بو حکایه بی اوقویان چوجق کندیسنه بر حصه  
چیقاردی ، کندی کندینه دیدیکه :

— کرپی دیکنلرینی چیقارماز . فقط بن فنا  
طبیعتی ترک ایدرم .

ایشته بو عقللی جه بردوشونمک ایدی ، چوجق  
اخلاقی دگشدردی . ای طبیعتلر قازاندی . بوجله  
هرکس کندیسيله ارقداش اولدی .

### — علوم —

#### حیوانات — مابعد

کرپی ، اورمانلرده بولنور بر حیواندر . اوستی

#### وظیفه — ۳۳

فنا طبیعتلی آدم ، آرقداشلرینی خشنود ایدرمی ؟ کندیسیده  
کندندن ممنون اولورمی ؟ فنا طبیعتلی آدم لرله اوینانیلورمی ؟  
حکایه دن مقصد نه ایدی خاطرلدیگزمی ؟ کرپی نه در ؟ بو حکایه ده  
کرپنک باشنه نه کلش آکلاتک ؟ طاوشانلر نه ایچون آنکله  
اوینامق ایستیمورلر ؟ کرپی دیکنلرینی آتہ بیلیرمی ؟ فنا طبیعتلی  
چوجقلرده او طبیعتلرندن واز کچه بیلیرمی ؟


دیکنرله قاپلیدر. کندینی مدافعه ایتک ایچون گولله  
گبی یووارلاق اولور. تکمیل  
دیکنلرینی دیکر.



شکل ۴۰ — کری

کری پک فائده لی حیواندر.

اورمانلرده بولنان زهرلی انگرک ییلانلرینی محوایدر.  
طاوشان و آطه طاوشانی ده اورمانده یشارلر. آطه



شکل ۴۱ — طاوشان و آطه طاوشانی

طاوشانلری یرالتنی قازارلر  
یووا یا پارلر. آطه طاوشاننک  
تویندن کچه یاپیلیر.

### وظیفه — ۳۴

کری گوردیگزمی؟ کتباگذرده کی رسمه باقک. کری پنک  
اوزرنده کی شیر نه در؟ اوزرینه هجوم ایدلکی وقت کندینی  
نصل مدافعه ایدر. کری نه یه فائده لی حیواندر؟ انگرک نه در؟  
طاوشان، آطه طاوشانی گوردیگزمی؟ طاوشان قورقادر.  
یبانی طوشان و آطه طوشانلری زرده یشارلر؟ آطه طوشا-  
نلری زرده یشارلر؟ آطه طاوشاننک تویندن نه یاپیلور؟

## -- اخلاق --

-- نجیب ایله خسته والدهسی --

اقر بامزه ایده جگمز غیرت

اقر باسنه یاردم ، غیرت ایدن چو جق نه قدر  
 بختیاردر ! دها گنجسگزر . فقط اقر باگز ه قارشو  
 شکران نعمتده بولمق ایچون دائما فرصت بوله .  
 بیلیر سگزر . یالگزر بولمق دیغنی ایستمه گز کافیدر . دیکلیگزر .  
 نجیبک والدهسی خسته ایدی . یتاقد ه یاتدیغی  
 حالد ه چالیشه مدیغندن طولای تأسف ایدیور .  
 گیزی گیزی آغلا یوردی .

مکتب تعطیللری زمانی گلدی . نجیب سوقاقد ه  
 اوینایه جغنه والدهسنه باقمه باشلادی .

آناسنک محتاج اولدیغی شیلری یتاغنه گتیرر .  
 آنکله برابر اوطورر ، قونوشور ایدی .

والدهسنی پک کدرلی ، غملی گوردیگی گون کتابی

آلیر حیزلی حیزلی اڭ گوزل یرلرینی اوقور. آناسیده  
 آنی دیکلییه رک غمنی ، کدرینی اونوتور ایدی .  
 آناسی چوق گچمندن اییلشدی . اوغلی نجیبه :  
 — اوغلم ! سنڭ غیرتک بنم ایی اولمامه یاردم  
 ایتدی دیدی .

چوجغندن اییلک گورمک قدر بروالدیه قیمتی  
 برشی یوقدر . بنی قوجاقله سن او یون اوینامدک .  
 بکا باقدک . گل قوجاغمه یاوروم . سن اڭ ایی بر  
 اولاد ایمشسک زیرا بونی غیرتکله گوستردک .

### وظیفه — ۳۵

اقرباسنه غیرت ، دقت ایدن چوجق نه درجه بخیار اولور؟  
 دنیاده وظیفه بی ایفا ایتک قدر انسانه مسعودیت ویره جک  
 برشی وارمیدر؟ والدیه سی خسته اولان بر چوجق نه یاپاییلیر ؟  
 نه درلو دقت ، غیرت ایدر؟ ایستدیگنی کوتورمگه آنکله برابر  
 اوطورمغه ، ایستدیکی وقت کتاب اوقومغه مجبور دگیلیر ؟  
 بروالدیه ایچون اڭ قیمتی شی ندر؟ اوغلنک محبتی ، غیرتی .



## — علوم —

— چارشبلر ، کتن ، بز —

یتاقلر مزك آیری آیری چارشبلری عادی بزدن  
یاپیلور . بزى اپلك ایله اوررلر .

ایپلگی فصل یاپارلر بیلیرمیسکمز؟ آنی کنویر  
دینلن برنباتك دالندن چیقاریرلر .

کتندن ده اپلك یاپیلور . کتن ماوی چیچکلی  
گوزل برنباتدر .

باقك بونلردن فصل اپلك یاپیلور؛ سزه آكلاتهیم .  
کنویر ویا کتن اییدن ائی یه اولنجه آنی قوپاریرلر .  
دالترینی ، صوده یومشانورلر . صوگره قوروتماق  
وارمك ایچون صودن چیقاریرلر ، ازیلدکن صوگره  
آنی بوکیجیلر آلیر . اوزون چوبلرله قوی ، گوزل  
اپلك یاپارلر .

بریتاق چارشبی ایچون بو قدر زحمت چکیلدیگنه  
شاشیور میسگنز ؟

## اخلاق

— حیوانلره فنا معامله ایتمک —

بر چفتلکده غایت یاراماز بر چوجق وارایدی.  
بتور کوندوز قازلری قووالامقله. آنلری دوگمکله  
وقت گچیر بردی. بونلری نیچون دوگدیکنی صور دیلر.

## وظیفه — ۳۶

یتیم اقلرمزه سردیگمز چارشبلر نهدن یاپیلیور ؟ بز نهدن  
یاپیلیور ؟ کنویر کوردیگزمی ؟ کتن کوردیگزمی ؟ کنویر ،  
کتن قوپاریلنجه نه یاپیلور ؟ آنلرک دالترینی نه ایچون صویه  
قویویورلر ؟ نیه ازییورلر ؟ بوکیچی کوردیگزمی ؟ آنلرک  
بوکدکلری آلتک اسمی نهدر ؟ ایک . بوندن ماعدا سزه بر  
شی دها سویلیه جگم اوده پک فائده لیدر : کنویر و کتنک  
دانهلری واردر . بودانهلردن نه یاپیلیور بیلیر میسگنز ؟ یاغ یاپیلور .  
زیرا بوقیمتلی نباتاتک هیچ بر شیئی غائب ایدلر . کتن یاغی  
رساملره یارار .

اوده : — بونلر احمق حیوان . برآز گورولتی  
اولنجه باغیرلر دیدی .

برآز زمان صوگره گیجه اثناسنده چفتلکه خرسزلر  
گیرد . آنلر اورالرده گزن بکچی کوپکی اولدر .  
مشلردی همان گلیدلری زورلایورلردی هرکس  
هیچ برشیدن شبهه لندیگی حالدده اویویوردی .

فقط قولاقلری زیاده سیله ایشیدن قازلر خر .  
سزلرک پاتردیلرینی ایشتدیلر .

قورقدقلرندن قنادلریله چیرپینه رق باغیرمغه  
باشلادیلر . او قدر گورولتی ایتدیلر که چفتلکده  
طویمدق کیمسه قالمادی .

خرسزلر بو حالدن شاشیره رق برشی آلمادقلری  
حالدده قاجدیلر .


ایرتسی گون چوجغه : سن دییوردک که قارلر  
اوافاق گورولتیدن طولای باغیروب چاغیریورلر

یابو آقشام آنلر باغیریمیه ایدی حالمز نه اوله جقدی؟  
چوجق زیاده سیله اوتانندی . بردها بو حالده  
بولنیمه جفنه و حیوانلره اذیت ایتیمه جگنه دائر  
توبه لر ایتدی .


— علوم —

— کومس حیوانلری —

یوز یاصدقلرگزک نه دن یاپیلدیغنی سزه سویلیه یم.



شکل ۲۲ — طاووق



شکل ۲۳ — هندی

وظیفه — ۳۷

حیوانلره زحمت ، اذیت ایتمک یارامازلق دکلیدر ؟ بزه  
فائده لری طوفنان کومس حیوانلرینه ده اذیت ایتمک یارامازلق  
دکلیدر ؟ قبونک سورگیلرینی کیم رودلار ؟

بونلر قازلرڭ، اوردكلرڭ تويندن ياپيلور. قازڭ ايرى  
تويلرى قلم ديه ده قوللانيلور. قازڭ اوردگك اتى ينير.  
يومورطه لرى ينير باقڭ كومس حيوانلرينڭ نه قدر  
فائده سى وار. كومس حيوانلرى آره سنده طاووق،  
هندى ده واردر. آنلرڭ ده اتى ينير.

### — كوپك —

كوپك هر حيواندن زياده افندي سنى سور. اولنجه يه  
قدر مدافعه ده بولنور.



شکل ۴۴ — كوپك

چوبان كوپكى . سورى يي  
بكلىر . بو كوپكلر جسار تليدر .  
قورد سورى يه هجوم ايدرسه  
آنكله پنجه لشير .

### وظيفه — ۳۸

يوزيا صدقلى نه دن ياپيلور ؟ قازڭ، ايرى تويلرى نه ايچون  
قوللانيلور ؟ كومس ده نه درلو حيوانلر واردر ؟ هندى  
نه يه يارار ؟



شکل ۵۰ - کوپک بوزیور

کوپکلر یوزر . کوپکلرک  
انواغی چوقدر . تازی صا-  
مسون . چوبان کوپکی ، فینو  
دوق بولر مشهوردر .

## — اخلاق —

— بر چوجفک دعاسی —

بر جمعه گونی اوکله اذانی او قونیوردی .  
عادل نامنده گنج بر چوجق گوزل گوزل گینمش



## وظیفه — ۳۹

افدیسی اڭ زیاده سون  
حیوان هانگی حیواندر ؟ کوپک  
صادقردیه نیچون سویلینیور ؟  
زیرا افدیسی سور . هر یرده  
آرقه سندن کیدر . افدیسی سنه -

شکل ۴۷ - کوپک

لرجه گورمهده طانیر . چوبان کوپکی نهیه یارار ؟ سورینک  
اطرافنده نصل بولنور ؟ کوپکلرک انواغی وارمیدر ؟

اولدینی حالده جامعہ گیتدی . جمعہ نمازینی قیلدی .  
نمازدن سوگرہ دعا ایدیلیرکن یانی باشنده اختیار  
برآدمک ده دعا ایتدیگنی گوردی .

بو آدم صاری بکنزلی مشقتدن یورولمش اولدینی  
یوزندن بللی ایدی . دعا ایدرکن الی آیاغی تیتره یوردی .  
عادل اختیارک بو حالنی گوردی . مرحمت ایتدی .  
بو آدم فقیر ایدی . اوگون پدرندن آلمش اولدینی  
گونده لکنی یواشجه جق جیبندن چیقاردی . دعا  
بیتر بیتمز او زواللی آدمک اننه صیقیشدیردی .

اختیار عادلہ تشکر ایدرک پاره پی آلدی . لکن  
بونى کیمسه گورمدی .

عادل وظیفه سنی اجرا ایتدیگندن طولای ممنون  
ایدی . یورگنده بیوک برمسرت حس ایدیوردی .  
اوراده جناب حقه سفیلر ایچون دعا ایتدی . بوندن  
بویله فقرايه یاردم ایده جگنی وعد ایلدی .

— علوم —

مسجد . جامع .

مسجد ، جامعلرڭ کوچگنه دینیر . جامع بیوک  
شهرلرده بولنور . جامعلر اکثریا پک گوزل صورتده  
یاپلمشدر . استانبولده سلیمانیه جامعی ، آیاصوفیه  
جامعی ، یگی جامع ، سلطان احمد جامعی ، سلطان  
محمد جامعی ، مشهوردر .

آیاصوفیه جامعی ، عثمانلیلرڭ استانبولی آلدقلى  
وقت گلیسادن جامع ایدلمشدر .


سلیمانیه جامعی ، صنعتلی یاپلمشدر . سلطان احمد  
جامعنڭ آتی وسلیمانیه نڭ درت مناره سی واردر .

وظیفه — ۴۰

اذان اوقونورکن ایشدیگزمی ؟ اذان فصل اوقونور ؟  
نرمده اوقونور ؟ منارلر نهدن یاپلمشدر ؟ جمعه نمازی فصل  
قینور ؟ فقرايه فصل یاردم ایتلی ؟ فقیرلره یاردم ایتک اییدر ؟



جامعہ عبادت محلیدر۔ اورالردہ نماز قیلنیر، جناب  
حقہ دعا ایدیلیر۔ اورادہ ای قلبی اولانلرک دعالری  
قبول اولنور۔ اویله ایسه بزده ای قلبی اولمغه چالیشه لم۔



اللهک بیوکلگی

— دگز — فورطنه —

روز کار اولدیمی . دگز طالغه لانیر . روز کار  
زیاده اولورسه طالغه بیور . گوک گورلمه سی گی  
گورولتیلر ایشیدیلیر .

وظیفه — ۴۱

مسجد نہدر؟ — جامعہ نرہ لردہ بولنور؟ استانبولده کی  
مشہور جامعہ لری صایک؟ آیاصوفیہ نصل جامعہدر؟ سلیمانیه  
نصل جامعہدر؟ سلطان احمدک قاچ مناردسی واردر؟ منارہ  
نصل شیدر؟ جامعہک ایچندہ نہلر واردر؟ امام نرہدہ نمازہ  
قیلیرر؟ نرہدہ خطبہ اوقور؟ جامعہ لردہ نہ یاپیلور؟ بش وقت  
نماز ہانگیلیردر؟

دڭز كىنار ىندە بولغان بىر مەكتەپكە شاكر دانى دڭزكە  
گورولتېسىنى ، فورطىنە نىڭ شىماتەسىنى ايشىدىرلر .  
درىسخانە نىڭ پنجرەلرىندىن دڭزكە گىپوكلې طالغەلرىنى  
كىناردەكى قىيالرە شىدتلە چارپىدىغى گوررلردى .



شەكىل ۲۷ — دڭز

چوچقىلر بو حالدىن  
قورقۇدىلر .


او وقت مەكتەپكە خوا-  
جەسى ، اوتە طرفىدە

دوشونجە يەتالمىش اولان دىكى بىر چوچقىغە : — نورى !  
دڭزە باقۇبدە نە دوشونىيورسەك ؟ دىيە صوردى .  
چوچقى بىر مەدەت دىھا دوشوندىكەن صوكرە .  
— اللەھى دوشونىيورم ، دىدى .

نورى يوسوزى سويلدىگى وقت ، چوچقىلر  
ھېسى دە دىگىليوردى .

بونك اوزرينه جمله سی :

حقیقت جناب حق نه قدر بیوک ! یاراتدینی  
 شو دگزك دهشتی بزى بوراده ایکن قورقوتیور .  
 یابز نه قدر کوچکز . بز او قدر کوچکزکه بر طالغه  
 بزى اویونجاق گبی پارچه پارچه ایدر ، دیدیلر .



— علوم —


بورا ، واپور .

بورا چیقیمی قیرده کی آغاجلری کوگندن چیقارر


وظیفه — ۴۲

طالغه نهدر ؟ طالغه روزگار چارمسیله صویك قباران  
 قسمیدر . برکسه ایچنده بولنان صویك اوزرینی اوفله سه گز  
 آنك اوزری چیزیک چیزیک اولور . ایشته سزه کوچك بر  
 طالغه . — دگز درینیدر ؟ دگزك بعض محلا ری پك دریندر  
 بوصویك آلتنده درلو درلو حیوانلر ، نباتلر واردر . انسان  
 دکزده فورطنه کورنجه اللهك بیوکلکینی نه دن آکلایور ؟

اولرک طاملرینی قوپارر. کره میدلرینی دوشورر. دگز




شکل ۲۹ — واپور



شکل ۲۸ — بورا

اوزرنده پک زیاده شدت گوسترر. فورطنه بی یاپان  
بورادر. طاغلر قدر طالغه لر یاپار.

یلکنلی گمیلرک دیرکلرینی. یلکنلرینی قیرار  
دوشورر. فقط انسانلر بشقه درلو گمیلر ایجاد  
ایتمشلر در. بو گمیلر دگزده یورومک ایچون دیرک



شکل ۳۰ — شمعدوفر

ویلکنه محتاج دگلدر. همده  
فورطنه یه زیاده سیله طیانور.  
بونلرک اسمی واپوردر.  
یعنی بوغوا یله یورین گمیلر در  
شمعدوفرلر ده بوغوا یله یورر.

— اخلاق — ثروت ملل —

— گوملگك تاربخى —

باقك بزم ايچون نه قدر كشي چاليشيور! چو جقلمر  
خبركز اولمدينى حالده سزك ايچون نيجه آدملمر  
چاليشمشلر و حالا چاليشمقده درلر .

### وظیفه — ۲۳

بور، قيرلرده نه درلو ضررلر ياپار؟ — شهرلرده نه درلو  
ضررلر ايدر؟ — دگژده كي شدتي نصلدر؟ فورطنه نه در؟ —  
فورطنه زياده اولورسه طالعهلر نه ياپار؟ — رسمه باقك .  
ديواره اوران طالعهلرك قيردقلىنى كورييورميسگنز؟ — دگز  
كنارنده ياييلان بويله ديوارلره ريختيم دينير . — فورطنه  
زماننده يلكنلى گمىلرك ديركلرى ، يلكنلى نه اولور؟  
يلكنسز كيدن و فورطنه يه زياده طايانان گمىلرك اسمى نه در؟  
واپور كوردىگزمى؟ — شكله باقك . ايچندن دومان چيقان  
بورى نه در؟ واپورك بيوك چرخه باقك . دكرمن چرخى گي  
دكلى؟ بوغو بوچرخى دوندرير . چرخده دونه دونه واپورى  
يوريتور . واپورك اسمى چرخك اوزرنده يازيليدر . او قومق  
بيليرسه گز او اسمى او قويه بيليرسگنز .

زیرا هر کس بر برینه یارديم ايدر . بر برینه خدمت گورر . بوانسانيت اقتضاسندندر .

سزه بونی آکلاته جق بر حکایه سویلیه یم می ؟  
ایشته اوزریکزه گیدیکز گوملکک تاریخی  
دیگلیکز . سزک گوملککز پاموقدن یاپیلور .

پاموق ویرن او گوزل آغاج بزم مملکت مزدن  
آطنه ده وسائر صیجاق مملکتلرده بولنور . آطنه ده  
بولنان آدملرده عثمانلیدر .

دیگر آدملرده اوراده چیقان پاموغی گمیلره  
یوکتورلر ده باشقه لری ده عری به لره . شمند و فرلره  
قویارلر .

بو پاموق فابریقه یه گلیر ، اوراده ایشجیلر آنی  
ایپلک یاپارلر . سز یاشده چوجقلر دائما قوبان ایپلک لری  
ماکنه لره ایلیدش دیرلر . بعده بو ایپلک لردن بزیا پارلر  
ترزی بوبزی مقاصیله کسر ، ایکنه سیله دیکر . سزه

برگو ملک یاپار. دها صوگره والده گز جینه اون بش  
غروش قویار. او اون بش غروشی برگون چالیشه رق  
پدر گز قزانیر. ایشته بواون بش غروشله دگرلردن  
قره لردن گلن کوچک برگو ملک آلیر.

باقک کوچک برگو ملک آلمق ایچون نه قدر  
زحمت. نه قدر اذیت چکیلیور. آرتق اوزریگزه  
گیدیگ گز اوربای سزه گیدرمک ایچون نه قدر  
آدمک چالیشدیغنی دوشونک! او یله ایسه اوربا گزی  
تمیز طوتک. زیرا آنلر قیمتلیدر. سزک ایچون  
چالیشان دیگر آدملری ده سوک. سزده بیودیگ گز  
وقت آنلردن گوردیگ گز اییگی. خدمتی آنلره  
ایتمکه چالیشک. سزده دیگر آدملری یعنی قرداشلر گز  
ایچون چالیشه جقسک.

وظیفه — ۴۴

اقربا گزدن ماعدا سزک ایچون چالیشمش وحالا چالیشان

— علوم —

— پاموق آغاجى —

پاموق آغاجىنىڭ چىچكى باغچەلر مژدە بولغان لىلاق



شکل ۵۲ — پاموق دىستىكى



شکل ۵۱ — پاموق

چىچكلرىنە بگزر. تخملىرى اينجە برتوى اچىندە در. تام

آدملر وارمىدر ؟ هر كس بر برينه خدمت گورمگه بور جليمىدر ؟  
شمسيه گز نەدن ياپلمشدر ؟ -- پاموق آغاجى زەرلردە بولنور ؟  
هانكى آدملر پاموق طوبلارلر ؟ شكە بافك شمندوفر پاموغي  
زەرلرە گتوريىور ؟ فابريقلر زەرەسىدر ؟ اورادە پاموقلر نە  
اولور ؟ فصل بز ياپيلور ؟ آنى مقراضيله كسن وديكن كيمدر ؟  
اوربالريگزي نە ايچون تميز طوملىسگيز ؟ انسانلرى سومگه  
نەدن مجبور سگيز ؟ آنلر سزە خدمت گورييورمى ؟ سزە  
آنلرە خدمت كورمكى آرزو ايدييورميسگيز ؟ انسانلرە  
زنگينلىكك، چالشمەنك يولنى كوسترن علمە نەدينير ؟ علم ثروت  
دينير . سز ايلرودە بو علمى اوكرەنەجكسگيز .



کماله ایردکلر نده بوتخملر قوش باشی قارگی آچیلور.  
انسانلر آنی طویلر : ایشته بزجینک . بز یادیغی  
پاموق بودر .

کوچک بر چوبانک سرگذشتی  
طاغ — قاریغینی

وقتیله ممش نامنده بر چوبان وار ایدی . سوریلرینی



شکل ۵۲ - قاریغینی

طاغلرده اوتلاتیوردی ، بوطا .  
غلرک گوکلره چیقان تپهلر نده  
اریمز بوزلر : قارلر بولنور .  
برگون ممش دره نك اك صیق  
اك طار بر یرنده بولنیوردی .

### وظیفه — ۵۵

پاموق آغاجلرینک چیچگی هانگی چیچکه بکذر ؟  
تخملمری نه ایله اورتولیدر ؟ پاموق ندر ؟ بز فابریقه سی کور  
دیگزمی ؟ کتـابده کی رسمه باقک . او شکل سزه پاموق  
ایپلکاری واسطه سیله بز یاپیلان بر دستگاه کوستر ؟ بوصنمه  
بزجیلک دینیر .

اینکاری. قویونلری ده تازه چیقمش اوتلری ییوردی.  
سوریسنی غایت دقتله محافظه ایدردی، زیرا باباسنک  
زنگینلگی بونلردن عبارت ایدی.

یاننده دایما سودیگی. اوقشادیغی گوزل کوچک  
برقوزی بولنوردی. زیرا حیوانلری پک سور، آنلره  
اذیت ایتمزدی. دیرکن بردن بره بیوک برگورولتی  
ایشیدلدی. گوک گورلیور صانیلیردی. بوگورولتی  
طاغک تپه سنندن یووارلانان. اوگنه گلن بیوک بر  
قاریغینی ایدی. سوری. قورقه رق قاچدی. ممش ده  
قوشمغه باشلادی هییچ شاشیر میوردی. لیکن کوچک  
قوزی دها قوشه مدیغندن آنی ده قوجاغنه آلدی.  
فقط قاریغینی، او قدر شدتلی دوشیوردیکه ممش  
قورتیله مدی. قارلرک آلتنده قالدی.

قارلرک آلتنده قالان ممش. کوچک قوزی یی  
گوکسندن صیقه رق ایصید یوردی.

یېغیلان . قارلر اوزرنده طام گبی اولدی . برکت  
ویرسون هوا آلهرق دلیکلر آچلمش ایدی . ممش  
اوراده بر خیلى زمان قالدی . اللهدن استمداد  
ایدیوردی .

فقط بوقار یېغینی ایچنده طوران چوجغڭ ییخی  
نصل بولمالی باباسی پک چوق آرادی . فقط نافله .  
او آرالق برقیون گوردی . اوده یاوروسنی آرایور .  
قارلری قوقلیوردی . قویون برده طوردی . آجی  
آجی مله مکه باشلادی . ممشک باباسی قویونک باغر .  
مسندن امیدلندی شورایی قازهم دیه النده کی کورک  
ایله قارلری آتمغه . همده ممش : ممش دیه باغیرمغه  
باشلادی . والحاصل قویونک مله مسنه بر مله مه  
جواب ویردی . بابانک صداسنه ده بر چوجق سسی  
مقابله ایتدی . آره سی چوق گچمه دی . بابا . گوزی یاش  
ایچنده اولدیغی حالده اوغلنی قوجاقلادی . ایکسی ده

آلله تشکر ایتدیلر . انسان اڭ تهلهکی زماننده  
بیله جناب حقدن امیدنی کسمه ملیدر .

### وظیفه — ۴۶


چوبان نهدر بیلیر میسگنز ؟ طاغ نهدر ؟ دره نهدر ؟ قویونک  
یاوروسنه نه دینیر ؟ قوزی گوردیگزمی ؟ قار بیغینی نهدر ؟  
انسان قار آلتنده قالیرسه طوگزامی ؟ خیر . زیرا قار صغوغه  
قارشى بر دیوار کبی خدمت ایدر . شماله یقین مملکتلرده  
دیوارلری ، کلبه لری قاردن یاپارلر . قار آلتنده قالنجه اڭ  
بیوک تهلهکی صغوق دکلدر . نهدر بیلیر میسگنز ؟ بوغلمق . قار  
آلتنده قالان آدمک نفس آلمیچون هوانک یوقارودن کلمی  
لازمدر . اوپله ایسه چوبان وقوزی فصل نفس آلیرلردی ؟  
قوقلامق نهدر ؟ تهلهکی زمانده . آیوس اولمق ایجاب ایدرمی ؟  
خیر . انسان دائمًا عقلنی باشنه طویلاملی . اوتهاکه دن قورتولمق  
ایچون لازم کلن ابی تدبیرلر قورمغه چالیشملی .

## — علوم —

## — طاغ ، بوزلقلر —

## سیللر — نهر

طاغلر . بيوك ، يوكسك طوپراق وقيا ييغينيدر .  
بونلر كته سي بعضاً بلو طلره قاريشير . طاغلر ده بوزلر



شكل ۵۱ — سيوللر

طوپلانير . بونلر ده بوزلق دينير  
اوبوزلر اريينجه آشاغيلره سييللر  
اينر . قيرلري . اووه لري صولار .  
ايكى اوچ سيل بر محله گلير سه



شكل ۵۵ — نهر

آنلر ك صولري برلشير . بيور .  
ايشته نهرلر ، ايرماقلر ، چايلر  
بونلر دن اولور . آنلر ده ،  
دگزلره ، گوللره آقار .

وظیفه — ۴۷

طاغ نهدر ؟ — بر طاغك اڭ يوكسك يرينه نه دينير ؟  
 تپه دينير — طاغلرڭ اوزرنده نهر واردر بيليرميسگنز ؟  
 بوزلق نهيه دينير بيليرميسگنز ؟ خير . اوبله ايسه آڭلاتيم .  
 بوزلقلر ، بر طاقم قار ، بوز ييغينلريدركه بعضاً بك چوق ير  
 قابلار . قيشين طوكمش گول ويا صو بريكنتييسي گورديكزمي ؟  
 ايشته طاغلرده بولنان بوزلقلر . طوكمش گول ويا دگزلره  
 بگزر . يوكسك طاغلرڭ تپه لري نه ايچون اريمز قارلرله  
 قابليدر ؟ زيرا اورالرده قارلر كاملاً اريمز . برده يوكسك  
 طاغلرڭ تپه لرنده ياز قيش قار بولور . طاعدن نه اينر ؟  
 سيللر . شكله باهك . بو سيللرڭ فصل اولديغني آڭلايورسگنز  
 دگلمي ؟ آنلر اڭتريا بوزلقلرڭ اودته سنده حاصل اولور .  
 بولنلر اريمش قار و بوزلردر . قارلر متصل ارير . سيللرده آقار  
 سيل نهدر غايت چاپوق آقان صودر . طاعدن اينن صو بك  
 خيزلي آقار . عجيبا نيچون ؟ زيرا باير آشاغي آقار . ايرماقلر  
 نهدن حاصل اولور ؟ نهرلردن حاصل اولور ؟ نهرلر نرهيه  
 آقار ؟ . . . دگزه . نهرك دگزلره برلشديگي محله نه دينير  
 بيليرميسگنز ؟ منصب دينير . نهرك طاعدن چيقديني محله نه  
 دينير ؟ منبع دينير . بر نهرك صاغ ويا صول كنار ي فصل  
 آڭلاشيلور ؟ بر قايق ويا گمي ايله كيديليركن نهرك آقديني  
 طرفه طوغري كيديلورسه صاغه گلن ، صاغ كناري ، صوله  
 كلن صول كناريدر .

## — اخلاق —

## طوغریلق

يوركلرى تميز. دوداقلر نندن دائما طوغرى سوز  
چيقان آدملىر نه قدر سويلير. آنلره نه قدر خرمت  
ايديلير؟

ايكى چوجق اويون اوينارلر كن ماصه نك  
اوزرنده بولنان ساعى دويرديلر. قباحترلرني گورر  
گورمز ايكيسيده شاشيردى. آغليه جق كې بربرلرينك  
صورتنه باقديلر.

چوجقلرك اڭ كوچكى بردن بره ديديكه : --  
بزي كيمسه كورمدى. بزه صوردارلر سه انكار  
ايدرز. بز دويرمك ديرز. آزارده ايشيتميز.  
بيوگى بونك اوزرينه :

— خير يالان سويلمگدن ايسه آزار ايشيتمك  
ايدرد ديدى. كوچك چوجق ايسه :

— نه ایچون ؟ دیدی .

بیوک جواب ویره رک :

— چونکه یالان فنا شیدر . یالانجیلر هر کسک

امنیتی غائب ایدر لر . گل قرداشم : قباحتمزی  
آنامزه سویلیه یم . دیدی .

ایکی قرداش والدهلرینه گیدوب خطالرینی  
سویلدیلر . آنلر آزار ایشیده جکلرینی اومویورلردی .  
لکن طوغریلقلری والدهلرینه طوقوندی آنلری  
عفو ایتدی .

آنلرده سوینه سوینه اوینامغه کیتدیلر . آنلر  
طوغری سویلدکلرینه اوقدر ممنون اولدیلر که  
بربرلرینی قوجاقلادیلر ، بوندن بویله طوغری  
سویلیه جکلرینی بربرلرینه وعد ایتدیلر .

وظیفه — ۸۸


یالان فنا ، اوتانیله حق برایشمیدر ؟ عجیبانه ایچون ؟



## — علوم —

## — عادی ساعت — چالار ساعت —

کتابده کی ساعتک مینه سی اوزر زنده بولنان ساعت



شکل ۵۶ — عادی ساعت

اشارت لرینی اوقومغه

چالیشه لم بوندن صوگره

عادی ساعتلرک او .

زنده کی ساعتلری ده

اوقورز . اولاکوچک

ایگنه نك اشارت

زیرا یالان سویلنلر جسارتلری اولدیغنی گوسترر . آنلر یالان  
سویلرلر . زیرا یابدقلری بدلقلری سویلمگه جسارت ایده .  
مزلر . قورقارلر . آزار ایشیتیمه لم دیه چکینورلر . جسارتی  
اولیانلره نه دینیر ؟ آنلره قورقاق آچاق دینیر ، او یله ایسه  
یالان - ویلمیک . زیرا یالانجیلق الحاققلدر . — طوغریلق  
نهدر ؟ یالانک ضدیدر . طوغری چوجق دیمک صبرلی ناموسلی  
چوجق دیمکدر . سزه صبرلی ، ناموسلی دینیرسه سوینیرمیسگر ؟  
بوشرفه نائل اولق ایچون اصلا یالان سویلمیک .

ایتدیگی کیناره باقڭ زیرا بو کوچک ایگنه بزه  
ساعتلری کوسترر. کوچک ایگنه سکز اشارتی  
اوزرنده. دیمک که ساعت سکز.

بعده ساعتدن زیاده نه قدر دقیقه وار دیه بیوک  
ایگنه یه باقڭ. دقیقه لر ساعتک اطرافنده نقطه لرله  
اشارت ایدلمشدر.



شکل ۵۷  
چالار ساعت

دقیقه اون ایکی رقمک صاغندن  
اعتباراً صاییلیر.

سز صایک. بر. ایکی. اوچ دیمک که

اوچ دقیقه زیاده بو حالده ساعت سکزه  
اوله لی اوچ دقیقه اولمش. دها ایسی سکزی اوچ گچیور.  
ساعتک بزه کوستردیگی ساعتلری بوش یره  
گچیرمیه لم. آنلر قیمتلیدر.

هر ساعتی. عاقلانه برایش ایله گچن گون نه قدر  
ابی گوندر!

بتون عمرینی ای گون ایله گچیرن آدم نه قدرایی،  
نه قدر عقلی آدمدر .

### وظیفه — ۴۹

مینه نه در ؟ اوزرینه ساعت اشارتلی یاپلمش یو وارلاق  
لوحه در . گوندوز قاج ساعتدر ؟ گیجه قاج ساعتدر ؟ مینه نك  
اوزرنده قاج ساعت یازیلیدر ؟ ساعتلی کوسترن ایگنه هانگیسیدر ؟  
اسمنه نه دینیر ؟ عقرب دینیر . مینه نك اوزرنده حیزلی می یورور ؟  
مینهی نه قدر زمانده بر کره طولاشه بیلیر ؟ بیوک ایگنه نه  
گوستر ؟ اسمی نه در ؟ یلقوان . بر ساعت قاج دقیقه در ؟ یازم  
ساعت قاج دقیقه در ؟ چاریک ساعت نه دیمکدر ؟ بیوک ایگنه  
مینهی نه قدر زمانده بر کره طولاشه بیلیر . مینه نك ساعت  
رقملری آره سننده کی چیزگیلر نه ایچوندر ؟ مینه نك ساعت  
رقملری آره سننده کی چیزگیلر نه ایچوندر ؟ مینه نك اوزرنده نه قدر  
چیزکی وار ؟ بر ساعتده نه قدر دقیقه وارسه او قدر چیزکی  
وارمیدر ؟ دقیقه نرمدن ونه طرفدن صایلیر ؟ بیوک ایگنه اون  
ایکی رقی اوزرنده ویا آلتی ویا خود طقوز رقی اوزرنده  
اولورسه نه دیمکدر ؟ شمیدی ساعتلی دقیقه لری او قویه بیلیر میسکیز ؟

— علوم —

— قويون — يوك —

قويون و ماريالرك آرقەلرندە قىل يرينە يوك  
واردر ھرسنە بويوكلر قيرپيلور. قيرپمغە مخصوص  
مقاصلر واردر .



شكل ۵۸ — قويون

بويوكلرى صوگرە  
بوكلرلر. يوك ايپلرلرلە اعلا  
اوربالر ياپيلور : اوربالرك

و پانطولونلرك چوقەلرى  
يوك قاشدن ياپيلير .

بوندن ماعدا آنقرە  
شەرنده اعلاچكيلر واردر .  
آنلرك تويلرينە تفتيك



شكل ۵۹ — قاش دستكامى

دينير ، تفتيكدن ايپك كبي قاشلر ياپيلور .

## — علوم —

— آی — سیارہ لر — ییلدزلر — قویروقلی ییلدزلر —  
گیجہ لری باشمزك اوزرنده پارل پارل پارلایان  
ییلدزلر حدسز حسابسزدر .

بزہ اك یقین اولان ییلدز آی در .

آی کره ارضك اطرافسده دوزر . آی ده بزم  
ارضمز گبی بر دنیا در .

## وظیفہ — ۵۰

یوڭ نهدر ؟ قویونلری قیرپارکن کوردیگزمی ؟ شکله بافك  
دیز اوستی کلمش اولان آدم اوراده نه یاپیلور ؟ یوڭ بیقاندقدن  
صوڭره نه یاپیلور ؟ آی بوکرلرمی ؟ بونی بوکمک ایچون قوللانیلان  
آله نهدینیر ؟ ایک ، اورکهدینیر . یوڭی ما کنه لرلده اگیرلر .  
ما کنه نك بر ساعتده بوکدیگی یوڭی بر عمله بر سنه ده  
یابه ماز . یوڭ اگیرلکدن صڭره نه یاپیلور ؟ قویونك یوڭی  
نهرنکده در ؟ آنلره ماوی ، فرمزی ، صاری یشیل رنك فصل  
ویریلیر ؟ آنلری بویارلر . شلته لرمن نهدن یاپیلور ؟ بوکولمامش  
بوکاردن یاپیلور . تفتیک نره ده چیقار ؟ هانکی حیوان تفتیک  
ویرر ؟

اوزرنده يوكسك طاغلر واردر . لکن كندی  
 كندینه ضیالی دگلدر . بزگیجه لری آنی پارلاق  
 گوریورز اووقت گونش آڭا ضیاویرر اگر کونش  
 بر طرفنی ضیالاندر مرزسه بز اوراسنی گوره میز .  
 اگر هیچ بر طرفنی ضیالاندر مرزسه بز آنی هیچ  
 گوره میز ، ایشته یگی آی بودر .

آیدن دها اوزاقده اوله رق گوکده پك، چوق  
 کوکبلر واردر . بعضلری ارضه بگزر بر طاقی آیه .  
 آنلره گونش ضیا ویرر . آنلرده بزم دنیا من کبی  
 کونشك اطرافنده دوزر . بونلره { سیاره } دینیر ،  
 دیگرلری گونشه بگزر . آنلرده کندی کندیلارینه  
 پارلاقدر . بونلرده { ثابته } دینیر .

بزه قیملدانمزگی گورینن بو کوکبلرک جمله سی  
 بر برینک اطرافنده دوزر . بونلرک جمله سی منتظماً  
 دوزر ایشته الهک بر بیوکلگی دها ؛

## وظیفه — ۵۱

آی کیمک اطرافنده دوزر؟ — آیك اوزرنده گولگه کبی  
 کورینن شیلر ندر؟ طاغلردر. آنلر بزه گولگه کبی کورینورلر.  
 آی بزه نهدن پارلاق کورینور؟ بدر ندر؟ آیك اون بشنجی  
 کونیدر. هلال کبی کورندیکی زمانه نه دینیر؟ تربیع اوّل  
 دینیر. اون بشنجی گونندن صوگره ینه بویله کورینرسه آکا  
 نه دینیر؟ تربیع ثانی دینیر. آیك بویله کورینشلی ینه نه دینیر؟  
 صفحات دینیر. گونشک ضیاسیله پارلاق کورینن ییلدیزلر  
 نه دینیر؟ کندی کندیلرینه پارلاق کورینن ییلدیزلر نه دینیر؟  
 کتابلرده کی شکه باقک اوردوده کی کونشدر. اطرافنده کیلر  
 سیاره لردر. آنلرک آره سنده کره ارضه واردر. آنی  
 کورینورمیسگز؟ یلدیزلر بزه کورندکلی کبی حرکت سزمی  
 کورینورلر؟ خیر آنلر بربرینک اطرافنده دوزر. آی کره  
 ارض اطرافنده دوزر. ارضه آی ایله برابر گونش اطرافنده  
 دوزر. گونشده کندی اطرافنده و بزم بیلمدیگمز برقاج ییلدیزلر  
 اطرافنده دوزر.

— صوگ —







مطابق اخبار و رسد فسی

۴۰	۲	تدریسات فیه (رسمی) ۱ نجی قسم	۵	۱	کوجک جغرافیا (رسمی)
۴۰	۲	مختصر عثمانی تاریخی	۴۰	۱	الفاه تریان
۴۰	۲	قرائت کتابی رسمی ۱ نجی سه	۴۰	۱	فرانسزجه الفابه رشدی بکک
۴۰	۲	قرائت کتابی « ۲ نجی سه	۴۰	۲	لکتور (فرانسزجه قرائت کتابی)
۴۰	۲	قرائت برنجی رشاد بک	۴۰	۲	ازین (رسمی)
۴۰	۲	مختصر عثمانی صرفی (یکی ترتیبده)	۴۰	۲	اصول تدریس
۴۰	۲	لاریو و الموری غرامری پره پاراتوار	۴۰	۲	تسهیل اسان برنجی قسم
۴۰	۲	مفید قواعد فارسی	۴۰	۲	ایکنجی قسم
۴۰	۱۲	نظری و عملی ملخص هندسه (شکلی)	۴۰	۲	تسهیل اسان اوچنجی قسم
۴۰	۲	قرائت فیه رسمی ۱ نجیسی هیئت	۴۰	۲	مختصر اسلام تاریخی
۴۰	۱	قرائت فیه « ۲ نجیسی نباتات	۴۰	۲	کوجک عثمانی صرفی (یکی ترتیب)
۴۰	۲	قرائت فیه « ۲ نجیسی حیوانات	۴۰	۲	قواعد عثمانیه (ترتیب جدید)
۴۰	۱	قرائت فیه « ۲ نجیسی حکمت	۴۰	۲	مجموعه افعال غیر قیاسیه
۴۰	۱	قرائت فیه « ۲ نجیسی ماکره و کیمیا	۴۰	۲	نمونه قواعد
۴۰	۵	او فیری «	۴۰	۲	عملی هندسه و رسم خطی (شکلی)
۴۰	۷	یکی جغرافیا	۴۰	۲	دروس شق (رسمی)
۴۰	۲	علاوه ای مخزن قواعد	۴۰	۲	مختصر عثمانی نحوی
۴۰	۲۰	عوامل (یکی ترتیب)	۴۰	۲	مختصر حفظ الصبح
۴۰	۲۰	رساله اربعه (یکی ترتیب)	۴۰	۱	کوجک عثمانی تاریخی
۴۰	۵	مناطق	۴۰	۴۰	زیده تاریخ عثمانی
۴۰	۲	حساب کتابی برنجی سه	۴۰	۲	مختصر جغرافیا
۴۰	۲	حساب کتابی ایکنجی سه	۴۰	۱	چو جقاره یادکار
۴۰	۱۰	یکی مجموعه مکالمه	۴۰	۲۰	حساب ذهني
۴۰	۱۰	رساله املا	۴۰	۵	تربیه اطفال
۴۰	۵	فیزلره قرائت کتابی (رسمی)	۴۰	۲۰	مختصر عثمانی جغرافیاسی
۴۰	۶	اصول دفتری	۴۰	۱	اسماء ترکیه (یکی ترتیب)
			۴۰	۲	کوجک حفظ الصبح
			۴۰	۲	چو جقاره ایچون کوجک کیمیه
			۴۰	۲	فارسی لسانی
			۴۰	۲۰	الفبای عثمانی
			۴۰	۲	دیکش وال ایشاری (رسمی)







